

# CURINITUTARI

## Mexüacame Xapayari Que Mütivarunü'airi Papuru

### Vaürisica

<sup>1</sup> Ne Papuru, ta'iva Susiteneximatü, tecanixevaüritüaca Curinitutari. Cürisitu Quesusi caneniuta'inieni nü'ariecame nemayanicü, müpaü mütinaquecaicü Cacaüyari. <sup>2</sup> Curinitutari xemeyutixexeüriva Cacaüyarisüa xemiemetetütü, tenixevaüritüaca. Cürisitu Quesusisie xeteviyatü, xecaniupasieni Cacaüyarisie mieme. Xecaniuta'inierieni yaxemütepasiencü, que memüte'uta'inierie yunaitü naisarie memehüave que mü'ane Tati'aitüvame Quesusi Cürisitu mühücü, que mü'ane müme tiva'aitüvame mühücü tameta tati'aitüvame mühücü. <sup>3</sup> Cacaüyari müta'uquiyari, Quesusi Cürisitu mütati'aitüvame, 'aixüa xüca mete'u'iyarini xehesie mieme, xüca mexepitüaca xemüca'uximatüariecacü yu'iyarisie.

### Pamüpariyusi que mütipitüacai, 'iyarisie timieme memütecumiquivacaicü

<sup>4</sup> Neheyemecü pamüpariyusi necanipitüaca Cacaüyari xehepaüsita, 'aixüa tiuca'iyaritü mütixe'umicü Cürisitu Quesusisie xeteviyacacu. <sup>5</sup> Nai tinitimüriyarümeni xehesie mieme, hesiena xeteviyacacu. Naimecü xecaniyüvaveni xemütiniunicü, naime xecatenimaica, <sup>6</sup> xehesie que mütiuseiriyarie mücü niuqui mihecüata

Cürisitu. <sup>7</sup> 'Ayumieme naime xecatenicumiquivani, tixaü pücareuyevese mexi xe'icuevie Tati'aitüvame Quesusi Cürisitu, masiütü mayeitüarienique. <sup>8</sup> Mücü canixeseiriyamüçü xeme, tapareyuque, xehesie mücarahüivanicü 'iya tucarisie quepaucua munuani Tati'aitüvame Quesusi Cürisitu. <sup>9</sup> Cacaüyari que maine yacatinicamieni. Mücü canihütütni que mü'ané müxe'uta'ini xemüyutaxevirecü nu'ayamatü Quesusi Cürisitu mütati'aitüvamemätü.

### *Cürisitu que tisanive*

<sup>10</sup> Perusü ne'ivama, vaüriyarica siepüre necanixepitüaniqueyu, Tati'aitüvame Quesusi Cürisitusüa temiemetetütü 'ipaü ne'utaitü, xeniuiqui yuxevicacu yaxeicüa xequetenecu'erivani, hixüata xepücyasanani. Masi xequenütüarieca yaxeicüa xeteyumaitü, yaxeicüa xetecu'erivatü. <sup>11</sup> Hipatü Curuhesüa miemete müpaü mecaneteniuhecüatüani xehepaüsita ne'ivama, quename vaniu, hipatü xeme xeyucuitüve. <sup>12</sup> 'Ipaü nepaine, xeme yuxexuitü 'ipaü xeputiyuane, Ne Papurusie necatiniviyani, xevitüta, Nesü 'Apuruxisie püta necatiniviyani, xevitüta, Nesü Sepaxisie püta necatiniviyani, xevitüta, Nesü Cürisitusie püta necatiniviyani. <sup>13</sup> Cürisitu que tisanive 'acu. Ne Papuru xehesie mieme que netiumierie curuxisie. Papurusüa xemiemetetütü que xete'uca'üvaxü. <sup>14</sup> Cari pamüparyusi nepipitüa Cacaüyari, xeime tüma nemüca'uca'üyaxüçü xeme, Cürisipu xeicüa, Cayu xeicüa, <sup>15</sup> capa 'uxa'atüni varie xevitü müpaü hainenicü, quename xeme xe'uca'üyarie nehesüa

xemiemetetütü. <sup>16</sup> Mesü necanivaruca'üyata 'Esitepanaxi quie quiecatari. 'Asinepücara'eriva xeimetümé que nemütiu'üyaxü. <sup>17</sup> Cürisitu que münereyenü'a, capünesihayenü'a nemüti'üyanenicü xeicüa. Niuqui 'aixüa manuyüne nemücuxatanicü caneneyenü'ani masi, peru nemüticuxatanicü yacü timaivemepaü necati'enierietü yacü xeicüa ne'utaitü. Me xüca müpaü netiuniucanique, yacü xeicüa catinicuxaxasivaniqueyu que mütiumierie Cürisitu curuxisie.

*Türücüriya que mütatipitüa, temaivavemete que mütarayeitüa Cürisitu, Cacaüyariyatipitüacacu*

<sup>18</sup> 'Icü niuqui que mütiumierie curuxisie manuyüne, yacü haineme mecani'erieca müme memütatümaiyyariexime. Tameri püta temütavicueisitüariexime que temüte'i'enie, mücü niuqui türücüriya canihüctüni Cacaüyarisüa mümieme. <sup>19</sup> 'Ipaü catine'uca, Tita memütemate temaivavemete, mücü necanica'unamüçü. Tita memütemaiwave yüvemete, mücü necanixa'eriemcamüçü.

<sup>20</sup> Haquevari temaivavemete, haquevari müme 'inüaricü memüte'üquita, haquevari niuqui xüxüatüvamete hicü miemetexi. Camüsü, tita memütemaiwave cuiepa memütama, yacü xeicüa haineme canayeitüani Cacaüyari. <sup>21</sup> Cui timaivetü, müpaü tiniuta'aita Cacaüyari, cuiepa memütama que memütemaiwave memüyutatexienicü meheitimanique Cacaüyari. Masi caniyuvaüriya Cacaüyari niuqui mücuxasiva müvatavicueisitüanicü müme yuri memüte'erie, sepa mücü niuqui yacü xeicüa haineme memü'erie hipatü.

22 Huriyusixi teüteriyari 'inüarite menivauca, Cüriyecusixi timaiveme niuquieya menivauca.  
 23 Tame Cürisitu püta tecanixatani, que mü'ane curuxisie mumierie que mütihüçü. Mücücü Huriyusixi meniutiquetamürixüani, yacü xeicüa ticuxaxasivame meni'erieca hipatü memücahuriyusixi. 24 Tame püta temuta'inierie, sepa Huriyusixi sepa Cüriyecusixi, müpaü tetenitamaica, Cürisitu canihüctüni que mü'ane türucariya mütasipitüa Cacaüyarisüa miemetütü, que mü'ane temaivavemete mütasi'ayeitüa Cacaüyari que mütimaive. 25 Sepanetü xüca Cacaüyari yacü xeicüa hainenique, mücüsiere masi yemecü catinimaiveniqueyu, teüteri hepaüna 'asimecatemaivavecacu. Sepa xüca Cacaüyari catürücaüyenique, masi yemecü canitürücaüyeniqueyu, teüteri hepaüna mecatürücavicacu. 26 Xequetenä'erivani que xe'anenetü xemuta'inierie ne'ivama. Camüsü, hipatü xeicüa xeme xecatenimaivavemetetüni, teüteri que memütecu'eriva. Hipatü xeicüa xepüve'eme, hipatü xeicüa mamarivavemete xepüvanivema, que xemüte'uta'inierie. 27 Masi 'ena cuiropa miemete tita yacü haineme memüte'erie canenuyeteüxieni Cacaüyari, para mütivatiteviyasitüanicü temaivavemete. Canenuyeteüxieni tita mücatitürücavi 'ena cuiropa, mütivatiteviyasitüanicü müme memütürücavi. 28 Cacaüyari canenuyeteüxieni tita tixaü mücatihüçü, tita mütxani'eriva, tita 'amücatiuve meta, para yacü xeicüa meyeitüanicü tita mütixuave, 29 capa xevitü tevi ve'eme yuxatanicü Cacaüyari hüxie. 30 Masi Cacaüyari müxe'unetüacü,

'ayumieme 'axecaniu'uvani, Cürisitu Quesusisie que xemüteviya. Cürisitu canihütüni que mü'ané Cacaüyari micaye, temaivavemeti mütasi'ayeitüanici, tasipitüatü heiseriemecü yatemütecahunicü, tasipatatü Cacaüyarisie mieme, tasixünatü. <sup>31</sup> 'Ayumieme müpaü cani'aneni que müre'uxa, Que mü'ané ve'eme müxatamüci, Ti'aitame quexatani ve'emetüme.

## 2

### *Que müticuxatacái Cürisitu hepäüsita, curuxisie que mütiümierie*

<sup>1</sup> Yaxeicüa neta ne'ivama, quepaucua xehesüa nemunua, cui yüvemepaü nepüçayüanecai que nemütiuniucacai, que nemütimaiivecai, quepaucua nemütxecuxaxatüvacai ne'ihecüatatü Cacaüyari que mü'ané. <sup>2</sup> Ipaü netininemaicaitüni püta, tixaü nepüçara'erivaniquecai xehesüa ne'uyeicatü, Quesusi Cürisitu xeicüa netina'erivaniquecaitüni, que mü'ané curuxisie mumierie que mütihütü.

<sup>3</sup> Nesüari necatürüyüyetü masi necaninuani xehesüa, neheumatü vaüca, ne'uyüyüacatü.

<sup>4</sup> Que nemütiuniucacai, titá nemüticuxatacái, timaivemepaü nemüti'enierienicü xeicüa nepüçayüanecai, visi netiuniutü xeicüa yuri nemütxe'eritüanicü nepüçayüanecai. Masi necanixehecüatüacaitüni 'Iyari que müti'ané, Cacaüyari que mütitürüyüye, <sup>5</sup> capa heuyevecacü titá teüteri memütemaivave para yuri xemüte'eriecacü xeme, masi Cacaüyari türücariyayasie püta yuri xemüte'eriecacü.

*Tita Cacaüyari 'Iyarieya masiücüme mürayeritüa*

**6** Tetemaivavetü masi tetenicuxatani müme memaye'axüavave vasata. Peru que temütemaivave, hicü miemetexi müpaü mepücatemaivave. Hicü miemetexi teva'aitüvameteta müpaü mepücatemaivave, müme yacü xeicüa memacünirüme. **7** Masi que temütecuxata tame, tenihecüatani tita müti'aviesiecai, que mütimaive Cacaüyari tetecuxatatü. Timaivetü que mütiyurieniquecai 'arique, visi te'aneneme que mütarayeitüani, mücü 'ana pücamasiücüci hicüque, sepa Cacaüyari müpaü mütiyumaicai cuie canetüarievacu cuxi. **8** Hicü miemetexi teva'aitüvamete hasuacua müpaü mepücatehetimaivavecai ni xevitü. Xüca müpaü metehetimanique, curuxisie mepüca'imieniqueyu Ti'aitame visi mü'ane. **9** Masi que müre'uxa,  
Tita tevi mücatixeiyave yühüxicü, mücati'enieve yunacacü,

Titacü mücatiyu'iyaritüave tevi,  
Müya 'aneneme Cacaüyari nivaruh'a ritüirieni  
Müme meminaqui'erie.

**10** Müya 'aneneme Cacaüyari masiücüme canayeitüani, 'Iyari yatatixeisitüacacu. Mücü 'Iyari catinimaica naisarie que müti'ane, naitü que mütiyumate Cacaüyari.

**11** Teüteri, que titita tevisie mieme yamüitimate tevi que mütiyumate. Tevi 'iyarieya hesiena müyeca canihütüni tita müpaü mütimate. Yaxeicüata tevi 'asipücatimate Cacaüyari que mütiyumate. Cacaüyari 'Iyarieya xeicüa müpaü catinimaica. **12** Tame 'uva cuiepa mieme 'iyari tepüca'uyeyesa. 'Iyari Cacaüyarisüa

mümieme püta tecaniuyeyeca, temütemaicacü tita Cacaüyari mütatiumi. <sup>13</sup> Tita 'Iyarisie mütimieme tetenivahecüasitüiyani müme 'Iyari memuyeyesa. 'Ayumieme quepaucua temixata tita Cacaüyari mütatiumi, tepücatecuxata que temüte'u'üquitüarie teva'enietü müme teüteri vahepaü xeicüa memütemaivave. Yatetenicuxatani 'Iyari que mütati'üquitüa püta.

<sup>14</sup> Tevi mücü 'Iyari müca'uyeyesa pücayuvaüriya mitanaqu'erienicü tita Cacaüyari 'Iyarieyasie mütimieme. Yacü xeicüa haineme cani'eriecamüçü. Pücayüve yamüretimanicü, me 'Iyari 'ipareviecacu xeicüa caniyüvemüçü mita'inüatacü que müti'ane tita 'Iyarisie mütimieme. <sup>15</sup> Que mü'ane mücü 'Iyari muyeyesa püta, nai catinita'inüatamüçü, peru xevitü 'Iyari müca'uyeyesa hepaüna püca'ita'inüata que mü'ane miyeyesa. <sup>16</sup> Que müre'uxa, Quepaicü pütime que müticu'eriva Ti'aitame, quepai pütita'üquitüani. Peru tame Cürisitupaü tetenicu'erivani.

### 3

#### *Cacaüyarimatü que temüte'uximaya*

<sup>1</sup> Neri ne'ivama, 'ana nepücayüvecái nemütixecuxaxatüvanicü que nemütivacuxaxatüva müme 'Iyari memuyeyesa. Müme vai xeicüa memühüme, türi Cürisitusie memüteviya que nemütivacuxaxatüva, müpaü püta netinixecuxaxatüvacaitüni xeme. <sup>2</sup> Resi nenixemicuacaitüni, 'icuai nepücaxe'umi, xemüca'iquemacaicü. Peru hicü cuxi xepüca'iquema, <sup>3</sup> vaisie xemüteviyacü cuxi. Mexi xeyumexütüa hipame vahepaüsita, mexi xeyucuitüve cuxi, cari vaisie xecateviya

xeicüa, teüteri vahepaü xecateyüa. <sup>4</sup> Xevitü quepaucua müpaü maine, Nesü Papurusie necatiniviyani, xevitüta, Nesü 'Apuruxisie netiniviyani, cari teüteri xeicüa xecanihümetüni.

<sup>5</sup> Mericüte, 'Apuruxitütü que titita. Papurutütü que netitita. Cacaüyari parevivametemama tecanihümetüni, tacümana yuri xeteniuera'eri. Ti'aitame que mütatiumi taxexuime, <sup>6</sup> ne neniucá'eni, 'Apuruxi ni'ipanecaitüni. Peru Cacaüyari canihüctüni mitinetüa. <sup>7</sup> 'Ayumieme 'esame tixaü pücatihüçü, 'ipavame tixaü pücatihüçü. Iya xeicüa mitinetüa tixaütü catinihüctüni Cacaüyaritütü. <sup>8</sup> Mecaniyuxevini 'esame 'ipavame. Yuxexuitü yu'ivarica mecaten'i'ivacacuni que memütecumaüvacai. <sup>9</sup> Cacaüyaramatü tecateni'uximayaca. Xemerí Cacaüyari vasiyaya xecanihümetüni.

Müdü meta, Cacaüyari veviyaya xecanihümetüni. <sup>10</sup> Cacaüyari 'aixüa tiuca'iyaritü que münetiumi, müpaü nepütitavevi tesariya quitüa mieme, qui vevivamete tiva'aitüvamepaü neyüanetü mütimaiivepaü. Xevitü qui pütavevieni heimana. Yuxexuitü mequeyucuerivayurieca que memüte'iveviva. <sup>11</sup> Tesariya quitüa mümieme 'apuve yuxevitü. Xevitü püçayüve tavari mitavevieni xeime. Quesusi Cürisitu canihüctüni tesariya 'amuve. <sup>12</sup> Hurucü püratacü tetexi visi mü'anenecü xüca 'utaquini heimana, cüyexicü 'üxacü müaxacü nusu, <sup>13</sup> yuxexuime vaveviya canihecüacamüçü. Tucari 'aye'ayu hecüatü canayeimüçü, tucari masiücütü que mürayani tai xuavecacu. Tai

canita'inüatamüçü yuxexuime vaveviya, 'aixüa que müti'anene. <sup>14</sup> Tita mütiutavevie xüca yuhayeva, 'ivevivame catini'ivacamüçü. <sup>15</sup> Me xüca 'utitani, 'ivevivame tinitatümaiymüçü. 'Ivevivame xeicüa canitaviceimüçü, peru que mü'ané taicü mutaviceipaü catini'eriecamüçü.

<sup>16</sup> Xüari xeme müpaü xecatenimaica, Cacaüyari tuquieya xemühümecü haque Cacaüyari 'Iyarieya meyeca. <sup>17</sup> Tevi xüca 'ica'una Cacaüyari tuquieya, Cacaüyari canica'unamüçü 'iya. Cacaüyari tuquieya canipasieca hesiena mieme. Xemerí xepühüme tuqui.

<sup>18</sup> Xepücateyu'irüviyani. Xüca xevitü xeme timaiveme yu'erieca, temaitavemete que memüteyu'erie hicü miemetexi, 'asicatimaitü püta que'ayani, yuri timaivetü mayanicü. <sup>19</sup> Cuiepa memütama que memütemaivave, yacü xeicüa haineme cani'erieca Cacaüyari. 'Ipaü catine'uca, Temaitavemete que memüteyucuamana, müçü yacatinivaviyani. <sup>20</sup> Tavari 'ipaü catine'uca, Ti'aitame catinimaica niuqui que memütexüatüa temaitavemete, yacü xeicüa niuqui memütxüatüacü catinimaica. <sup>21</sup> Ayumieme 'aixüa püca'ane ve'emeti müvaxatanicü teüteri. Masi naitü xehesüa catinimiemetüni. <sup>22</sup> Sepa Papuru, sepa 'Apuruxi sepa Sepaxi, sepa cuie, sepa xemayeneniere, sepa xemucui, sepa hicü mieme xemütehexeiya, sepa 'uxa'atüni varie mieme xemütehexeiya, naitü xehesüa catinimiemetüni. <sup>23</sup> Xemeta Cürisitusüa xecanimiemetetüni, Cürisituta Cacaüyarisüa canimiemetüni.

## 4

*Nü'arisixi que memütehüritüariecai*

<sup>1</sup> 'Ipaüta tequete'erivani tame, Cürisitu tupirisiximama que temütehüme, que temüte'uhüritüarie temihecüatanicü tita müti'aviesiecai Cacaüyari hepaüsita. <sup>2</sup> Camüsü 'ena xüca hüritüarieca, caneuyeveca yamüticamienicü. <sup>3</sup> Peru xüca xeme xenesicu'ivaviyanique 'isücate vahepaü, xüca 'isücate memüteüteri xeicüa menesicu'ivaviyanique, tixaü nepücane'iyaritüacaqueyu mücüçü. Ni necümana nepücane'ivaviyave. <sup>4</sup> Sepa 'asinemücatimate nehesie nemürahüpanicü, mücüçü xeicüa heiserie nepücahexeiya. <sup>5</sup> Ti'aitame püta canihüctüni que mü'ané 'isücametütü münesicu'ivaviyani. 'Ayumieme xepüca'inüatani tucariyari ca'aye'avecacu cuxi, Ti'aitame 'acuxi canuavecacu. Mücü canihecüariviyamüçü tita mütiuti'aviesie yüvipa. Masiücüme caneyeitüamüçü que memüteyuriecu teüteri yu'iyarisie. 'Anaqueri yuxexuitü 'aixüa mecatenicühüavarüvacuni, Cacaüyari que mütivanaquisitüani.

<sup>6</sup> Yanemütixehecüatüanicü ne'ivama, 'ayumieme necaninexatacaitüni, 'Apuruxi necanixatacaitünta, para xetasihä'erivatü xemeitimanicü 'icü 'inüari, Que müre'uxa püca'anuyehaitürüveni, manuyüne, capa xevitü 'utahüsierienicü, xeimecü naqui'atü, xeime püta xani'erietü. <sup>7</sup> Camüsü quepaicü pe'anuyehaitürüveme pümasi'ayeitüa. Tita perxeiye pecatimiquievetü. Mericüte, xüca petiumiquieni, titayariri ve'eme peti'axata, pecaticumiquivame pe'axatatü.

**8** Xemeri xüari xeniuhxaca, naime xetehxeiyatü xenacüneri. Xecanaye'axüani te'aitamete xe'acüneca, xetasitave'erietü tame. Xüca yuricü te'aitamete xe'acüneque tüma, tametari xehamatü tete'aitatü temacüneçü. **9** Ipaü netinicu'erivani, Cacaüyari pütasi'ucayasaxü tame nü'arisixi, 'imatüremete temühümətünici, müme memanutaxüriya me cui'ivaque vahepaü temü'anenenicü. Te'ixüariyatü tecanacüne cuiepa memütama vahüxic, Cacaüyari tupirisiximama teüterita vahüxic. **10** Tame yacü te'utiyuaneme tecani'erivani Cürisitusie mieme, cari xeme püta xecatenimaivaveni Cürisitusie xeteviyatü. Tameri tepücatürücavi, cari xeme xecanitürücvini. 'Aixüa xecatenicuxaxasivani xeme, tame püta tenixani'erivani. **11** Hicüque teneuhacacuicuni teneuharicuni tenimamaveni teniutiveiyani teneu'uvacatetüni. **12** Tetenita'uxitüaca tamamacı tete'ivatü. 'Axa tetecühüavarüvatü, 'aixüa teputiyuane. Te'uveiyarietü yatepüte'uca'eniva. **13** 'Axa me'utiyuanecacu tahepaüsita, tepüvanütüa. Cuiepa xasiyaripaü tecani'aneneni, naime temüxiquiyaripaü tecani'aneneni hicüque.

**14** Ipaü neti'utüatü nepücxeteviyasitüamüci. Masi nepüxenütüamüci nenivema xemühümecü nemüxenaqu'eriecü. **15** Sepa tamamata miriyari xemüvarexeiyaniq teixe'üquitüvamete Cürisitusie xeteviyacacu, yumüireme xepüçavarexeiya yuquemasima. Cürisitu Quesusisie netiviyatü, niuqui 'aixüa manuyüne neticuxatatü, necanixe'utinuivitüani. **16** 'Ayumieme vaüriyarica necanixepitüaca, xenesi'üketü xequenacüni.

**17** Müpaü xemütecahunicü, 'ayumieme xehesüa

nepeitanü'a Timuteu. Mücüta caninenivetüni, neninaqui'erieca, yacatinicamieni Ti'aitamesie tiviyatü. Mücü canixe'aye'eritüamüçü que nemütiuyeica Cürisitu Quesusisie netiviyatü, yaxeicüa que nemüti'üquita naisarie memeyutixexeüriva vahesüa. <sup>18</sup> Hipatü vaniu mecaniuthüsierieni, xehesüa necaheta'ame me'erietü. <sup>19</sup> Neri cuitüva necaneta'amüçü xehesüa, xüca müpaü tinaqueni Ti'aitame. 'Ana nepüretimani que memütetürücavi müme müpaü memütehüsierietüca, sepa que memütecuxata. <sup>20</sup> Cacaüyari ti'aitametücacu, pücaheuyevese vaüca müticuxatanicü. Mücü ti'aitametücacu, türçariya puxuave püta. <sup>21</sup> Que tixenaque. Xehesüa netita'ani nexetavayatü. Nepeta'ani nusu nexenaqui'erietü neca'ane'eriyatü 'acu.

## 5

### *Que mütiuta'inüiasie xevitü mürucuyanecai*

<sup>1</sup> Cari müpaü catinicuniuvani, quename xeniu, xevitü xeme 'icumaüva que mü'ane mücayü'uya. Que memücateyurie nuivarite, yacatiniyurieneni 'iya 'icumaüvatü. Yutevari xeniu caniutivitüni. <sup>2</sup> Cari xeme xepühüsierietüca. Caneuyeveca masi xemutisuananicü, yusata xemenuyenü'anicü müya mütiyuriene. <sup>3</sup> Nesü sepa nevaiyarisie teva nemuyeica, netininemaica xehesüa nemuyeicanipaü. <sup>4</sup> 'Ipaü xequeteneuyuri Ti'aitame Quesusi xehüavetü. Xequeneuyucuxeürrie, neta xehamatü ne'uyeicacacu yacütütü. Tati'aitüvame Quesusi xeturüçayacakü, <sup>5</sup> xequeneyetua que mü'ane müya mü'ane, Cauyumarie mica'unacü vaiyarieya,

'iyarieya püta mütavicueisitüarienicü 'iya tucarisie quepaucua munuani Ti'aitame.

<sup>6</sup> Ve'eme te que xemüteyuxata, mücü 'aixüa püca'ane. Müpaü xecatemate, 'esipemecü pa naitü caniutacuxaniriyarieni ticuxanariyamecü.

<sup>7</sup> Xequeneyu'iteca ticuxanariyame müye'i mumavenicü, 'axa que xemüteyuriecai. Pa mühecu püta xequenacüni, xemü'itiyatücanicü yaxeicüa mücü 'ixüararipa que memüte'i'itiva pa cujaxanime, cacuxaxanime xeicüa memütecuanicü püta. Mücü 'ixüararipa muxasi türxi que memüte'ucuicuiva, teüteri meteha'erivacacu Cacaüyari que mütivaruhayevaxü vateüterima, hicüta yaxeicüa mavariyari 'ari caniumierieni Cürisitütü. <sup>8</sup> 'Ayumieme tame temü'ixüaramete yacütütü, ye'imecü cujaxanimecü tepüçayüaca, 'axa 'aneneme tehxeiyatü 'axa teteyurietü. Masi cacuxaxanitü que müticuaiva 'ixüararipa, tameta 'aixüa tequetehecüasieca, yuri teque'utiyuaneni.

<sup>9</sup> Müpaü netinixe'u'utüirieni xeime xapasie, xemücavanücacü rucusixi ne'utaitü. <sup>10</sup> Nesü nepücavaxatacái 'ena cuiepa memürucusixi, müme naime memütehive'erie yuhesie mieme, memütenavaya, mümeta tetexi memüvarayexeiya. Müme yemecü xüca xecavanücaque, caneuyevecaqueyu masi cuiepa xemücayuhayevacü, xemanuyecüneçü püta. <sup>11</sup> Ipaü necanaineni hicü, que nemütxe'u'utüiri 'ana, ta'iva yuxatatü xüca rucuyaneni, xüca naime tihive'erieca yuhesie mieme, xüca tetexi varayexeiyani, xüca 'axa 'utaineni hipame vahepaüsita, xüca taveneni, xüca tinavayani,

müpaü nepaine, müpaü 'aneme xepücanüca, ni hamatüana xepücatecuaca. <sup>12</sup> Careuyevese 'acu xemüva'inüatanicü yuhesüa miemete. Queri reuyevecaqueyu nemüvata'inüatanicü tacua miemete, <sup>13</sup> Cacaüyari püta mü'isücamecü müvacu'ivaviyacü. Peru yusata xequenanuyenü'a xeme que mü'ane 'axa mütiyuriene.

## 6

*Que mütivarutahüavixü, que memüteyuxanetacai  
'isücate yuri memücate'erie vahüxie*

<sup>1</sup> Xevitü xeme xüca 'ixanetamücüni yu'ivatüme, queri tiyumaica menuhanacü 'isücate yuri memücate'erie vahüxie, Cacaüyari teüterimama vahüxie püta cayuvaüriyatü. <sup>2</sup> Müpaü xecatemate, Cacaüyari teüterimama 'isücate tenacünicuni cuiepa memütama tevati'ivaviyaque. Xücasü xeme xehümetüni xemüva'inüatanı cuiepa memütama, titayari xecateyüvave xemüte'inüatanicü 'esitipeme hepaüsita. <sup>3</sup> Müpaü xecatemate, tame tepüvata'inüatanı Cacaüyari tupirisiximama. Pini hepaüsita titayari xecateyüvave masi yemecü. <sup>4</sup> Me xücarı pini hepaüsita xeyuxanetani, titayari xetavarayasa 'isücate memücamariva memüyuyexexeüriva vasata memüva'enienicü. <sup>5</sup> Nexe teviyasitüanique 'ipaü netinicuxatani. Ni xevitü 'acatiuyeica xesata timaivetü, yüvetü müti'inüatanicü 'ivamama que memüteyuxaneta. <sup>6</sup> Masisü yu'ivamatü xepüyuxaneta, müya xeteyurietü müme yuri memücate'erie vahüxie.

<sup>7</sup> Masiri mexi xeyuxaneta, yemecü xeniyutexieca xemaye'axüanicü. Titayari masi xecatevapitüaca hipame, 'axa memüxeyurienicü, titayari masi xecateyutauni xemünnavaiyarienicü. <sup>8</sup> Peru xeme püta 'axa xecaniyuyurieni. Xecaniyunavatüveni yu'ivamatü.

<sup>9</sup> Müpaü xecatemate, müme 'axa memüteyurie vahesie pücatinaqueni memaye'axüanicü Cacaüyartiva'aitüvame mayanicü. Xepücateyu'irüviyaniri. Xüca 'icumaüvani que mü'ané mücayü'üya mücayücüna, tetexi xüca varayexeiyani, xüca 'icumaüvani xeime 'üyaya cünaya, xüca 'uquitütü 'ucari vahepaü yüaneni, 'uquitütü xüca 'icumaüvani xeime 'uqui, <sup>10</sup> xüca tinavayani, xüca naime tihive'erieca yuhesie mieme, xüca taveneniri, xüca 'axa 'utaineni hipame vahepaüsita, xüca ticumaüvani hipame tivapini, hesiena pücatinaqueni maye'anicü, Cacaüyarti'aitüvame mayanicü. <sup>11</sup> Müpaü xe'anenetü xecanihümetücaitüni hipatü. Perusü hicürixüa xecaniu'itiyani masi. Xecaniupasieni Cacaüyarisie mieme. Heiserie xecaniupitüarieni, Ti'aitame Quesusi Cürisitusüa xemiemetetütü, tacacaüyari 'iyarieyaside xeteviyatü.

*Yuvaiyarisie xe'u'uvatü, visi ticuxaxasivame xequenayeitüa Cacaüyari*

<sup>12</sup> Heiserie necanexeiyani nai nemütiyurienenicü, que pemaine. Xasunicü, peru nai netiyurienetü nepücapareviyani. Que pemaine, heiserie nepexeiya nai nemütiyurienenicü, peru nepücanevaüriya tixaütü heiserie mexeiyanicü nehepaüsita. <sup>13</sup> 'Icuai

rayuriepa catini'ayumiemetüni, rayuriepa 'icuaisie catini'ayumiemetünita, que pemaine. Hü, peru Cacaüyari 'uxa'atüni varie canitaxütüamüçü rayuriepa 'icuaimame. Peru ravaiyari para micumaüvanicü que mü'ane mücayü'üya mücayücüna, mücüçü püca'ayumieme. Ti'aitamesie mieme püta catini'ayumiemetüni, Ti'aitame tavaiyarisie mieme catini'ayumiemetünita. <sup>14</sup> Cacaüyari canenucuquetüani Ti'aitame. Catananucu'uitüamüçü tameta yütürücariyacü.

<sup>15</sup> Müpaü xecatemate, xevaiyari Cürisitu mamateya 'ücateya canihütütni. Mericüte, tita Cürisitu vaiyarieyasie mütimieme, ne que netinavairieni Cürisitu, para 'uca tuminicü muyuvitünüa pinieya mürayanicü. Pücatixaü yemecü. <sup>16</sup> Müpaü xecatemate, que mü'ane 'uca tuminicü muyuvitünüasie mütiviya, yuhamatü xei vaiyari mecanacücani meyxevitü. Que maine 'utüaricayari, Yuhutatü xei vaiyari mecanacünicuni meyxevitü. <sup>17</sup> Masi que mü'ane Ti'aitamesie mütiviya, yuhamatü xei 'iyariyari mecanacücani meyxevitü.

<sup>18</sup> Xequeneyuta'una capa xe'imayüanicü que mü'ane mücayü'üya mücayücüna. Naime 'axa que mütiyuriene tevi, püçayusevixima yuvaiyarisie, peraine. Pücatixaü, masi que mü'ane micumaüva que mü'ane mücayü'üya mücayücüna, mücü püyusevixima yuvaiyarisie. <sup>19</sup> Müpaü xecatemate, xevaiyari tuqui canihütütni 'Iyari Mütiyupatasie mieme, xehesie müyecacü. Cacaüyari canixepitüaca mücü 'Iyari. Xeme yükümana xepüçayucusiyarima. <sup>20</sup> Xevitü püta

'uyutuacu xepunananaiya. 'Ayumieme yuvaiyarisie visi ticuxaxasivame xequenayeitüa Cacaüyari, yu'iyarisie meta, Cacaüyari mücusiyyariewacü.

## 7

### *Müme memüneneüque memüväqui vahepaüsita*

<sup>1</sup> Nepütixetaxatüaniqueyu yuxapasie que xemünete'uta'ivavyaxü. 'Aixüa cani'aneni xüca 'uqui 'uca cacumaüvani. <sup>2</sup> Peru rucusixi memüyümüirecü, 'uquisi yuxexuitü yü'ütama mequevarexeiyani, 'ucarita yuxexuitü yükünama mequevarexeiyani. <sup>3</sup> 'Uqui que'ipitüaca yü'üya que müreuyevese, yaxeicüata 'uca quetipitüaca yüküna. <sup>4</sup> 'Uca heiserie pücahexeiya yuvaiyari hepaüsita, cünaya püta heiserie canexeiyani. Yaxeicüata 'uqui heiserie pücahexeiya yuvaiyari hepaüsita, 'üyaya püta heiserie canexeiyani. <sup>5</sup> Xepücatehayeva xeyucumaüvatü, me xeyu'enietü 'esiva xeicüa xüca yaxeteheutevini, neneviericü xemü'ayumiemetetünicü, tavari xeyuxevitü xe'acüneque, capa Cauyumarie xe'uta'inüatacü, capa xecayüvavenicü xemüteyu'aitüacacü.

<sup>6</sup> 'Ipaü nepaine xemütemaicacü que xemüte'upitüarie. Netixe'aitüatü nepücahaine. <sup>7</sup> Müpaü pünetinaqueniqueyu, xüca yunaitü teüteri nehepaü me'anenenenique. Masisü Cacaüyari 'aixüa tiuca'iyaritü yükü catinivapitüaca yuxexuime, xeime 'ipaü, xeimeta müpaü.

<sup>8</sup> 'Ipaü netinivarutahüave müme memücaneneüque memüväqui, viyurasixi meta. 'Aixüa caniyümüçü xüca nehepaü me'anenetü meyuhayeva. <sup>9</sup> Me xüca müpaü mecayüvaveni,

meque'utineneüque meque'utiviquieni. Mecuxi queneüqueni, mecuxi queviequieca, capa 'utatanicü.

<sup>10</sup> Peru müme memüneneüque memüviqui, müpaü netiniva'aitüaca, masi ne pücatixaü, Ti'aitame püta müpaü tinivaruta'aitüani, 'uca yüküna pücacu'eirieni. <sup>11</sup> Me xüca 'icu'eirieni, neuyeveca caviquietü müyuhayevacü, ya neuyeveca hutarieca munuanicü yükünasüa. 'Uquita yü'üya pücacu'eirieni.

<sup>12</sup> Hipameri müpaü netinivarutahüave, Ti'aitame 'asimüca'utayüçü 'icü hepaüsita, xevitü ta'ivatütü yü'üya xüca 'avitücüni yuri cati'eriecame, xüca 'üyaya yuvaüriyani hamatüana mucanicü, mücü püca'icu'eirieni yü'üya. <sup>13</sup> 'Uca meta yüküna xüca hexeyiyani yuri cati'eriecame, xüca cünaya yuvaüriyani hamatüana mucanicü, mücü püca'icu'eirieni yüküna. <sup>14</sup> 'Uqui yuri mücati'erie canipasieca yü'üyasie tiviyatü. 'Uca yuri mücati'erieta canipasieca ta'ivasie tiviyatü. Mesü xüca müpaü ca'anenique, xenivema mepüca'itiyatücanique, peru müpaü mü'anecü, mecanipasieca Cacaüyarisie miemecü. <sup>15</sup> Peru que mü'ane yuri mücati'erie xüca 'i'eirimücüni yuri ti'eriecame, mecuxi queheyani. Pücaheuyevese ta'iva 'uquitütü 'ucatütü hesiena tiviyatü müyuhayevacü xüca müpaü 'aneni. Cacaüyari que mütatiuta'ini, cataniuta'inieni hesiena temüteviyanicü teca'uximatüarrietü ta'iyyarisie. <sup>16</sup> 'Uca queri petimate, xüca pe'itavicueisitüani 'acüna. 'Uquita que petimate xüca pe'itavicueisitüani 'a'üya.

<sup>17</sup> Mücü xeicüari, Ti'aitame que mütivarupitüa

yuxexuime, que me'anenetü 'amemu'uvacai yuxexuitü quepaucua Cacaüyari müvaruta'ini, müpaü me'anenetü meque'u'uvani. 'Ipaü netiniva'aitüaca yunaitü memeyutixexeüriva naisarie. <sup>18</sup> Huriyusixi vaxitequiyacü 'inüasietü xüca 'uta'inierieni, pücaheyeitüani va'inüari. Ca'inüasietü vaxitequiyacü xüca 'uta'inierieni, pücayu'aitani mü'inüaritüarienicü. <sup>19</sup> Sepa mu'inüasie, sepa müca'u'inüasie, xüca yaticamieni que müti'aita Cacaüyari, mücü xeicüa caneuyevaca. <sup>20</sup> Yuxexuitü que me'anenetü memuta'inierie, müpaü meteyurietü mequeyuhayeva. <sup>21</sup> Vaüriyarica peti'uximayacai quepaucua pemuta'inierie. Sepasü pepüca'a'iyaritüaca mücücü. Me xüca peyüveni pemüxünecü, 'aixüa caniyümüçü masi. <sup>22</sup> Que mü'ane muta'inierie Ti'aitamesie mütiviyanicü, vaüriyarica ti'uximayatame hücütütü, xünariecame nayani Ti'aitamesie mieme. Müpaüta yaxeicüa, que mü'ane muta'inierie xünitetü, 'iya Cürisitusie mieme catini'uximayatametüni. <sup>23</sup> Xevitü 'uyutuacu xepunanaiya. Te'uximayatametetütü xepüca'acüne teüteri vahesie mieme. <sup>24</sup> Yuxexuitü que me'anenetü memuta'inierie, müpaü meteyurietü mequeyuhayeva Cacaüyarisie meteviyatü. Müpaü nepaine ne'ivama.

<sup>25</sup> Müme memücaxuriquitüca vahepaüsita tixaü nepücarexeiya Ti'aitame yatiu'aitacu. Peru que nemüticu'eriva netinixetaxatüani müpaü netimaitü, Ti'aitame caneninenimayaca neniuqui müseüyenicü. <sup>26</sup> 'Ayumieme 'ipaü 'aixüa

'aneme nenierieca hicü temü'uximatüariecü, 'aixüa cani'aneni xüca tevi yuhayeva que müti'ane. <sup>27</sup> 'Uca petiuvitütüarie 'acu. Mericüte, pepücaticuvauneni pemü'axünacü. 'Uca petimave 'acu. Pepüca'icuvauni 'uca. <sup>28</sup> Me xüca peneüqueni, 'aixüa cani'aneni, 'axa petiuyurieme pepüca'a'erieca. Üimari mücaxuriqui xüca 'utiviquieni, 'aixüa cani'aneni, 'axa tiuyurieme püçayu'erieca. Mücü xeicüa, müme memüvitütüarie mecani'uximatüariecuni mexi yuvaiyarisie me'u'uva. Ne masi nepünaqui'acaqueyu xüca xeca'uximatüariecaque.

<sup>29</sup> Ipaü nepaine ne'ivama, tucari canaye'aximeniri. Mexicuxi, müme memüvaravitücü yü'ütama, yaxeicüa müme memücavaravitücü vahepaü meque'aneneni, <sup>30</sup> mümeta memutisuana müme memüca'utisuana vahepaü meque'aneneni, mümeta memüyutemamavie müme memücayutemamavie vahepaü meque'aneneni, müme memütenanetüve, müme memüca'atüiyarievave vahepaü meque'aneneni, <sup>31</sup> müme memi'usarüva 'ena cuiepa timieme, yaxeicüa müme memüca'i'usarüva vahepaü meque'aneneni. 'Icü cuie que mü'ane 'epücareutere.

<sup>32</sup> Pünesinaque xemücayu'iyaritüacacü vaüca xeteha'erivatü. Que mü'ane mücareca'üya, Ti'aitamesie timiemecü niyu'iyaritüaca, que mütinaqui'asitüani Ti'aitame. <sup>33</sup> Que mü'ane müreca'üya cuiepa timiemecü niyu'iyaritüaca, que mütinaqui'asitüani yü'üya. <sup>34</sup> Hutamecü müpaü tinimaica. 'Uca mücarecacüna mücaxuriqui meta niyu'iyaritüaca Ti'aitamesie timiemecü, hesiena

mieme müpasienicü yuvaiyarisie yu'iyarisieta. Que mü'ané mürecacüna niyu'iyaritüaca cuiepa timiemecü, que mütinaqui'asitüani yücüna.

<sup>35</sup> Ipaü netinicuxatani xemüpareviyanicü. Nexeviniyamütü nepüca'utaine. 'Aixüa 'anemecü xemümasiücünicü que müreuyevese neputaine, Ti'aitamesie mieme xemü'ayumiemetetünicü xecacuhapanietüvetü.

<sup>36</sup> Me xüca 'ümari hexeiyanı mücaxuriqui, 'aixüa que mücati'ané 'iyurieme xüca yu'erieca, xüca 'e'uteviniri, xüca reuyeveca müpaü mü'anenicü, que mütinaque yaquetiuyurieni. 'Aixüa caniyümüçü, meque'utineneüque, 'axa mete'uyurieme mepücayu'erieca. <sup>37</sup> Que mü'ané müseire yu'iyarisie, tixaü careuyehüatü, yünü'avetü que mütiyumaté, xüca yu'iyarisie müpaü tiyumaica mi'üviyanicü caxuriquime que mü'ané hesüana mümieme, 'aixüa catiniyuriemüçü. <sup>38</sup> 'Ayumieme que mü'ané mivitütüa 'ümari mücaxuriqui hesüana mümieme, mücü 'aixüa catiniyuriemüçü, que mü'ané müca'ivitütüa masi 'aixüa catiniyuriemüçü.

<sup>39</sup> Caneuyeveca 'uca yücünasie mütiviyanicü mexi 'ayeyuri 'uqui. Xüca cünaya 'umüni, canixünariemüçü. Caniyüvemüçü mütiviquienicü que mütinaque, peru Ti'aitamesie tiviyatü xeicüa canitivitümüçü. <sup>40</sup> Ne que nemüticu'eriva, caniyutemaviecamüçü masi xüca müpaü 'anetü yuhayeva. Müpaüta netinicu'erivani, neta Cacaüyari 'Iyarieya nepxeiyea.

*Tita tetexi memütemaviyari hepaüsita*

<sup>1</sup> Tita cacaüyarixi memütemaviyari hepaüsita netinixetaxatüaniqeyu. 'Ipaü tetenimaica, quename tanaitü tetemate que temütecu'eriva. Peru yatetemaitü que temütecu'eriva, mücüçü tecanihüsieriecuni xeicüa. Tetetacanaqui'erietü püta tecaniseiriyariecuni masi. <sup>2</sup> Tixaütü timaiveme xüca yu'erieca, 'acuxi 'asipücatimaive que müreuyevese yamütimäicacü. <sup>3</sup> Masi xüca 'inaqui'erieca Cacaüyari, Cacaüyari canimaicamüçü müya mü'ané.

<sup>4</sup> Mericüte, 'icuau hepaüsita cacaüyarixi que memütemaviyari, müpaü tepütemate, tete pücaxuave cuiropa yuri mücacaüyari, xevitü pücaxuave cacaüyaritütü. 'Iya yuxevitü 'acaniuveni xeicüa cacaüyaritütü. <sup>5</sup> Peru sepa 'amemu'uva müme cacaüyarixi memüte'umamativa taheima cuiropa, cacaüyarixi que memüteyumüire, te'aitamete que memüteyumüire, <sup>6</sup> masi tame que temütemate, Cacaüyari caniyuxevini ta'uquiyaritütü. Naitü hesiena canayeneicani, tame hesiena mieme tecani'ayumiemetetüni. Ti'aitameta caniyuxevini Quesusi Cürisitu hütütütü. Naitü tiniunetüarieni 'iya 'inetüacu, tameta teniunexüani 'iya tası'unetüacu.

<sup>7</sup> Peru yunaitü 'ipaü mepücatemate. Hipatü 'acuxi mecacanivaratu'maiyavaveni, mevamaive'erietü memanucuneniere. Müme quepaucua memicua'a tete mavarieya, müçü cacaüyari mecanä'erivani. Müpaü metecu'erivatü mecaniyuseviximaca yu'iyarisie, memücaseseüye que memüteyumatecü. <sup>8</sup> Mericüte, ta'icuau pücatasi'aye'atüani Cacaüarisüa. Sepa

temüca'icua'a, yaxeicüa tixaü tepücateheuyehüva. Mesü, sepa temicua'a, mücücü tepücapareviya.

<sup>9</sup> Xequeneyucuerivayurieca, capa xavarutiquetamüracü müme memücaseseüye, xetecuatü heiserie que xemütehexeiya. <sup>10</sup> 'Ecü müpaü xeniu pemüttimate, xüca caseüyetü masixeiyani mana peticuacame xeime cacaüyari tuquieyasie, que mütiyumate catiuväüriyarieni miticuanicü tita mütimaviyari mücü cacaüyari. <sup>11</sup> 'Iya mücaseüye canitatümaiyyariemüçü masi, 'ecü müpaü pemüttimatecü, sepa mü'a'iva, sepa Cürisitu hesiena mieme mumü. <sup>12</sup> Müpaü 'axa xevayurietü yu'ivama, xevatavayatü müme que memüteyumate, 'axa xecaniyurieca Cürisitu. <sup>13</sup> 'Ayumieme xüca 'icuaicü 'utiquetamüre ne'iva, meuxi nemüca'itikuani vai neheyemecü, capa ne'itiquetamüracü ne'iva.

## 9

### *Nü'aritütü heiserie que mürexeyiyacai*

<sup>1</sup> Camüsü necatinenü'ave ne. Necatinü'ariecame 'acu. Quesusi necatiuxei Tati'aitüvame. Xeme xecatehue tita mütiutixuaverixü neticumävacacu ne, Ti'aitamesie netiviyatü. <sup>2</sup> Sepa hipatü nü'ariecame memücanesi'eriecaeque, xeme xecanenimaica nü'ari que nemütihüçü. Ne'inüari xecanihümetüni, xecümana catinimasiücüni nü'ari que nemütihüçü Ti'aitamesie netiviyatü.

<sup>3</sup> Ipaü nepaine ne'utaniutü nehesie mieme, neva'eiyatü müme memünesixaneta. <sup>4</sup> Camüsü, heiserie tecatehexeiya temütemiquienicü para temütecuanicü temüte'ienicü. <sup>5</sup> Heiserie tecatehexeiya ta'ütama temüvaravitücünicü

ta'utüma, 'ivamarixi mehümetüme, que memüteyurie hipatü nü'arisixi, Ti'aitame 'ivamama que memütevaravitücü, Sepaxita que mütiyuriene.

<sup>6</sup> Ne xeicüa Verunave xeicüa xüari müpaü tepücatepitüarie, temütehayevacü tete'ivatü.

<sup>7</sup> Tamüsü, quepaicü cuya payani yuxaüta tiyupitüatü. Quepaicü haraveri muca'iteüta pücaticuani 'icuaxiyari. Quepaicü va'üviyatü muxasi, varesiyari ca'anu'ieni. <sup>8</sup> Tevipaü xeicüa que neticuxata, ipaü ne'utaitü. Inüari niuquiyari yaxeicüa caraine 'acu. <sup>9</sup> Müpaü catine'uca Muisexi 'inüarieyasie, Pepüca'isurihüani puixi quepaucua mitiquesina türifu mütihenarienicü. Puixisixi vahütü xeicüa que ticuxata Cacaüyari. <sup>10</sup> Masi tahesie mieme caticuxata. Tahesie mieme yemecü müpaü püraca'utüarie, meuyevesecü cuiesaname mücuiresananenicü yuri ti'erietü mexi ta'icueva, 'uvameta müti'unicü yuri ti'erietü quename 'icuaxiyari hexeiyatü 'ayani. <sup>11</sup> Tame 'iyarisie timieme tecaniuca'eni xehesüa. 'Aixüa catiyüni vaisie timieme xüca te'uca'isanani yaxetatemicuacacu. <sup>12</sup> Hipame xecanivapitüaca heiserie memexeiyanicü xehepaüsita. Tame masi yemecü heiserie tecatehexeiya temütemiquienicü.

Peru sepa heiserie temexeiya mücüci, müpaü tepücayüa. Naime tepütenevie masi, temüca'inenacacü niuqui 'aixüa manuyüne Cürisitu hepäüsita. <sup>13</sup> Müpaü xecatemate, müme tuquita memüte'uximaya, müme tuquita mieme mepütecua'a. Müme müratimavatüre memü'ayumieme, mavaripa mieme meteniuhanpanani. <sup>14</sup> Ti'aitame yaxeicüa tinivaruta'aitüani müme niuqui 'aixüa manuyüne memücxata,

müme memüte'ivanicü yametecuxatatü. <sup>15</sup> Ne xeicüa nepücanevaüriya müpaü nemütiyurienenicü. Que nemütiu'utüa meta, müpaü nepüca'utaine yanemütimiquienicü. Mecuxi nemümüniqueyu masi. Xevitü yacü ne'utaineme pücanesi'ayeitüani, 'aixüa que nemüticuxata nehepaüsita.

<sup>16</sup> Sepa niuqui 'aixüa manuyüne nemücxata, masi mücüçü nepücayüve 'aixüa nemüticuxatanicü nehepaüsita. Vaüriyarica masi netinicuxatani. Xüa 'ui, que nemütinemaicaqueyu, xüca niuqui 'aixüa manuyüne necacuxatanique. <sup>17</sup> Xüca nenevaüriyanique müpaü nemütiyurienenicü, nepüti'ivaniqueyu. Masi nepuviyarie hürütüaricacü, sepa nemücanevaüriyanique. <sup>18</sup> Querite neti'ivani 'acu. Niuqui 'aixüa manuyüne xüca necuxatani necatinecuetatü, mücü canine'ivaricatüni. Netinicuxatamücüni yanecatiyurienetü heiserie que nemürexeiya, niuqui 'aixüa manuyüne necuxatatu.

<sup>19</sup> Sepa nemünenü'ave, yunaime vahesie mieme vaüriyarica neti'uximayatatü nepaneyeyitüva, yumüüreme masi nemüvarahapanacü.

<sup>20</sup> Huriyusixi nevacuxaxatüvatü, nepünehuriyuta, nemüvarahapanacü Huriyusixi. Müme 'inüari niuquiyarisie mepüteviya, 'ayumieme vahepaü ne'anetü nepaneyeyitüva nemüvarahapanacü müme 'inüari niuquiyarisie memüteviya, sepa va'inüarisie nemücativiya ne. <sup>21</sup> Nuivarite meta mücü 'inüari niuquiyari memümamave nevacuxaxatüvatü, vahepaü ne'anetü nepaneyeyitüva, nemüvarahapanacü müme 'inüari niuquiyari memümamave, sepa Cacaüyüri hüxie 'inüari nemücamave ne,

Cürisitu 'inüarieya nehexeyatü. <sup>22</sup> Müme memücaseseüye nevacuxaxatüvatü, necaseüyetü nepaneyeyitüva, nemüvarahapanacü müme memücaseseüye. Yunaima nevacuxaxatüvatü, naime nenaneyeitüvani xüca 'acu naimecü nevatavicueisitüani hipame. <sup>23</sup> Ipaü naime yanecatiniyurieneni niuqui 'aixüa manuyünesie mieme, neta nehesie mieme mütinaquenicü que maine niuquiyari.

<sup>24</sup> Müpaü xecatecate, müme parecu memüte'unanausa, yunaitü metanausame, xevitü xeicüa heixeiyatü nayeimüçü 'ivaricasie mieme. Yaxeicüata xeme, xequeteneunanausani para xeheixeiyatü xemacünecü. <sup>25</sup> Yunaitü parecu memüte'unanausa mecateniyu'aitüaca naimecü. Müpaü meteniyurieca müme mumä mütixainive memühuritüarienicü. Tame masi mumä mücatixainive tecanihuritüariecuni. <sup>26</sup> Nesietü que nemütiunanausa, 'aixüa necatinimaica que nemütimie. Que nemütinemiene, 'eca nepücacuvaxüaxime. <sup>27</sup> Masi nevaiyari nepücvaya. Nepünemaxiuta capa ne'utixani'erivacü ne, netivacuxaxatüvame hipame.

## 10

*Que mütivacu'imaiyacai capa tetexi mevarayex-eiyanicü*

<sup>1</sup> Yaxeicüa ne'ivama, neuyeveca müpaü xemütemaicacü, tatevarima yunaitü mücü haivitüritüa quepaucua memu'uvacai, yunaitü mana haramarasie quepaucua memanucü, <sup>2</sup> yunaitü müme yacütütü Muisexisie meteviyatü meniuca'üyarieni haivitürisie

haramarasie. <sup>3</sup> Yunaitü 'axeicüa 'iyarisie mieme meteniciuacaitüni, <sup>4</sup> yunaitü 'axeicüa 'iyarisie mieme meteniharecaitüni. 'Iyarisie mieme tete müvaruveiyacai, mücü nivaharitüacaitüni. Mücü tete Cürisitu canihütütüacaitüni. <sup>5</sup> Sepanetü, Cacaüyari pücanaqui'acai yumüireme vahepaüsita. Macumavesie mecaniutixüriyaniri vacaxarite.

<sup>6</sup> Mericüsü, mücü 'inüari caniuyüni tahesie mieme, capa te'ihive'eriecacü titä 'axa müti'anene, müme memüteyucahive'eriecaipaü. <sup>7</sup> Yaxeicüa tetexi xavarayexeiyatü xepüca'acüne, hipame müme vahepaü. Müpaü catine'uca, Teüteri meniucayaxixüani memütecuanicü memüte'ienicü, 'arique mananucu'uni memüteneitüvenicü. <sup>8</sup> Yaxeicüata, que mü'ane mücata'uya mücatacüna tepüvacumäüvani, hipatü müme que memüte'uyuri. Mevarucumayüaca, meniucuini xei tucarisie, xei teviyari heimana haica miriyari meyupaümetü müme. <sup>9</sup> Mücü meta, tepücate'i'uxitüaca Ti'aitame te'i'isipatüvetü, hipatü müme que memüte'uyuri. Me'i'isipaca, cuterixi vacü meniutatümaiyaneni müme. <sup>10</sup> Mücü meta, xepücaniuquixieca, yaxeicüa hipatü müme que memüte'uyuri. Me'uniuquixiecu, ti'uname nivaruca'una müme.

<sup>11</sup> Mericüte, que memu'itüarie müme, 'inüari caniuyüni. Yacatinaca'utüarieni que mütiyüü, temü'imaiyarienicü tame, tucari manucatüa maye'acü, taparetü 'ate'u'uvacacu tame. <sup>12</sup> 'Ayumieme que mü'ane 'a'uveme müyu'erie, mücü queyü'üviyani capa 'acavenicü. <sup>13</sup> Teüteri que memüte'isiparie xeicüa xecateni'isiparieca xeme. Cacaüyari masi yacatinicamieni que

maine. Mücü püçaxepitüani xemü'isiparienicü que xemücateyüvave. Xe'isipariecacu masi canixepitüamücü que xemütevicuecacü, xepitüatü xemüyüvavenicü xete'uca'enivatü.

<sup>14</sup> 'Ayumieme nenaqui'erima, xequeneyuta'una capa tetexi xavarayexeiyanicü. <sup>15</sup> Temaivavemete nemütivacuxaxatüvapaü, müpaü necatinixecuxaxatüvani xeme. Yücumana xequeneu'inüata tita nemüraine. <sup>16</sup> Tecüxi hepaüsita quepaucua 'aixüa temutiyuane Cacaüyari hepaüsita, mücü tecüxicü tecatetaxevisi Cürisitumatü, yuxuriya que mütiutayeuri. Pa quepaucua temititara, mücü pacü tecatetaxevisi Cürisitumatü, yuvaiyarisie que mütiumierie. <sup>17</sup> Mücü pa que mütiyuxevi, tameta tamüiretü xei vaiyari tecanihümüetüni. Tanaitü 'axeicüa tenitihapananı xei payarisie mieme.

<sup>18</sup> Mücü meta, müme 'Ixaheri nuivarieyasie memütinunuiva xequenivara'erivani. Müme mavari memütecua'a, mecateyuxevi müratimavatüre miemematü. <sup>19</sup> Mericüte, quesü nehainericü. Tita tete mütimaviyari tixaütü mütiühüccü neraine. Tete cacaüyariyari tixaütü mütiühüccü neraine. <sup>20</sup> Masisüari 'ipaü nenaineni, tita memütemava nuivarite, cacaüyarixi 'axa memü'anene vahesie mieme mecatenimavani, que mü'ane yuri cacaüyari mücahücüsie mieme. Pücanesinaque xemüyutaxevirecü cacaüyarixi 'axa memü'anene vahamatü. <sup>21</sup> Xepüçayüvave Ti'aitame tecüxieyasie mieme xemanu'ieni, mexi xe'enuye'e cacaüyarixi 'axa memü'anene vatecüxisie mieme. Xepüçayüvave Ti'aitame 'icuaiya xemütecuanı, mexi xetecua'a cacaüyarixi 'axa memü'anene va'icuai. <sup>22</sup> Me, tete'ihaxüatüani

Ti'aitame. Que tetetürücavi tame, Ti'aitame tahepaü catitürücaüyecacu.

*Nai xequeteneyurieca Cacaüyari visi müticuxaxasivanicü*

<sup>23</sup> Que pemaine, heiserie tecanexeiyani nai temüteyurienicü, peru nai teteyurietü tepücapareviyani. Heiserie tecanexeiyani nai temüteyurienicü 'acu, peru nai teteyurietü tepücaseiriyarieni. <sup>24</sup> Mecuxi yuxexuitü mepücatecuvauni yuxaüta 'aixüa memü'itüarienicü. Mequetecuvauni hipatü püta 'aixüa memü'itüarienicü.

<sup>25</sup> Naitü mütituiya quiecarí hixüapa, mücü xequetenecuaca, tixaü xecayu'iyaritüatü que xemüteyumate. <sup>26</sup> Cuie Ti'aitame pinieya catinihütüni, naitü cuiepa mütixuave catinipinieyatünta.

<sup>27</sup> Peru xevitü yuri cati'erietü xüca xe'uta'inieni xemütecuanicü quiena, xüca xeyuvaüriyani xemuhucü, nai que xemütemiquieni xequeteneuticua'i, tixaü xecayu'iyaritüatü que xemüteyumate.

<sup>28</sup> Peru xevitü xüca müpaü tixe'utahüaveque, 'Icü tete mavarieya canihütüni, 'utaitü, mecoxí xepüca'iticuaniqueyu, xehe'erivatü que mü'ané yamütixe'utahecüatüa, xehe'erivatü que mütiyumate, capa yu'iyaritüanicü. <sup>29</sup> Que xemüteyumate xeme, 'asinepücahaine. 'Iya püta que mütiyumate nepaine.

Mericüte, peru 'aixüa que tiyüni, xüca nenü'avetü nexani'erivani, xevitü müyu'iyaritüacü que mütiyumate. <sup>30</sup> Xüca ne'iticuani pamüparyusi ne'ipitüatü Cacaüyari, titayariri

'axa neticühüavarüva ne'icuatü, hepaüsítana pamüparyisi nemipitüacü Cacaüyari. <sup>31</sup> Mericüsü, sepa xemütecua'a, sepa xemüte'ie, sepa titä xemüteyurie, nai xequeteneyurieca Cacaüyari visi müticuxaxasivanicü. <sup>32</sup> Xepücavatı'ücamüraxüani Huriyusixi, müme memücahuriyusixi meta, müme meta memeyutixexeüriva Cacaüyarisüa miemete. <sup>33</sup> Naimecü necatiniyurieneni memüpareviyanicü yunaitü. 'Aixüa nemü'itüarienicü ne, mücüçü nepücayüane. Yumüiretü 'aixüa memü'itüarienicü püta necaniyüanenı, memütavicueisitüarienicü müme.

## 11

<sup>1</sup> Xenesi'üquetü xequenacüni, neta que nemüti'üque Cürisitu.

### *'Ucari que memüte'umucuresi*

<sup>2</sup> 'Aixüa nepaine xehepaüsita xemünesiha'erivacü naimecü, yaxemütecahucü yeiyarisie que nemütixeyetuirı. <sup>3</sup> Peru neuyeveca müpaü xemütemaicacü, Cürisitu yunaime 'uquisi canivamu'utüni, 'uquita 'uca canimu'uyatüni, Cacaüyara Cürisitu canimu'uyatüni. <sup>4</sup> 'Uqui xüca yutanenevieni, xüca ticuxatani, yucumu'ututü, caniyuteviyasitüaca yumu'ucü. <sup>5</sup> 'Uca püta xüca yutanenevieni, xüca ticuxatani, cayucumu'ututü, caniyuteviyasitüaca yumu'ucü. Yaxeicüa catiniyünequeyı xüca yumu'usie yucaxicanique.

<sup>6</sup> Xüca cayucumu'utuca 'uca, mecuxi queheyucaxicanı. Me 'uca xüca yuteviyani yucaxime, mu'umesetü, queyucumu'utuca masi.

<sup>7</sup> Pücaheuyevese müyucumu'utucacü 'uqui, Cacaüyari 'üquisicaya mühüçüçü, hesiena mümasiüçü que

mü'ane Cacaüyari. 'Ucasie masi canimasiücüni que mü'ane 'uqui. <sup>8</sup> Sutüapai 'uqui 'ucasie püca'ayene, 'uca 'uquisie payene püta. <sup>9</sup> Mütü meta, 'uqui püca'unetüarrie 'ucasie mieme, 'uca 'uquisie mieme caniunetüarieni püta. <sup>10</sup> 'Ayumieme caneuyevaca 'uca 'inüari manuyecacü yumu'usie, cümana mümasiücüni heiserie que mürexeiya, Cacaüyari tupirisiximama vara'erivatü. <sup>11</sup> Peru Ti'aitamesie meteviyatü que memüte'u'uva, 'uca 'apüca'uyeica 'uqui caheuyehüatü, 'uquita 'apüca'uyeica 'uca caheuyehüatü. <sup>12</sup> 'Uca 'uquisie payene 'ana, peru 'uqui 'ucasie püyenuiva. Naitü masi Cacaüyarisie catinayenexüani.

<sup>13</sup> Yücmána xequeneu'inüata que xemüteyumate. 'Aixüa ti'ane xüca 'uca nenevieri 'ipitüani Cacaüyari cayucumu'ututü. <sup>14</sup> Camü yututuyaricü müpaü xecate'üquitüarie, que mütivevive 'uqui xüca cüpateya 'etütüni, <sup>15</sup> 'uca püta visi que müti'ane xüca cüpateya 'etütüni. Yücpa caniumiquieni manuyunacacü. <sup>16</sup> Me xüca xevitü niuquixiemücüni, müpaü quetimaica, tame tepücaheixeiya yeiyari müpaü 'aneme, Cacaüyarisüa miemete memeyutixexeüriva, mümeta mücü yeiyari mepücahexeiya.

*Que memüte'iseviximacai Ti'aitame 'Icuaiya  
inüariyari*

<sup>17</sup> 'Ipaü que nemütixe'aitüa, nepücayüve 'aixüa nemutainenicü xehepaüsita, que xemüteyuyexexeüriva. 'Aixüa xepüca'itüariva yaxeteyuyexexeürivatü, 'axa xecani'itüarieca püta. <sup>18</sup> Mütü meri, que müraniuva, 'axeicüa quepaucua xemüyuyexexeüriva, yuhixüata

xecaniyusanani. Hixüata 'arücamecü müpaü yuri nepüti'erie que müraniuva. <sup>19</sup> Süricü neuyeveca yuxexuime vahesie xemüteviyanicü, xesata mümasiücünicü müme memühecüasie. <sup>20</sup> 'Axeicüa quepaucua xemüyuyexexeüriva que xemütecua'a, Ti'aitame 'Icuaiya pücahüçü. <sup>21</sup> Yuxexuitü xecaniyumexütüaca, yu'icuai xe'ahapatü, quepaucua xemütecua'a. Xevitü neuhacamücüni, xevitüta nitaveca. <sup>22</sup> Cari quite xepücatehexeiya xemütecuanicü xemüte'ienicü. Masicutaxi xetevateviyasitüa müme tixaü memücatehexeiya, xevaxani'erietü müme memüyuyexexeüriva Cacaüyarisüa miemete. Queri netixetahüave. 'Aixüa netiutaineni xehepaüsita 'acu. 'Ipaü que xemüteyurie, 'aixüa nepüca'utaineni xehepaüsita.

*Ti'aitame 'Icuaiya que mütiu'aisie 'inüariyari  
(Mateu 26:26-29; Maricuxi 14:22-25; Rucaxi  
22:14-20)*

<sup>23</sup> Que nemütixeyeturi, neta necaniyeturiyarieni Ti'aitamesüa mieme. Müpaü tiniuyüni. Mücü tücarisie quepaucua müyetuiyaniquecai, Ti'aitame Quesusi pa nanucu'üni. <sup>24</sup> Pamüparyusi 'ipitüaca Cacaüvari, canititara pa, müpaü 'utaitü, 'Icü nevaiyari canihütütni. Xehesie canimiemetüni. 'Ipaü xequeteneyurieca xemünesiha'erivanicü ne. <sup>25</sup> Yaxeicüata tiniuyurieni tecüxi 'anucuhanatü mete'ucuacu, müpaü 'utaitü, 'Icü tecüxitä mieme türatu mühecua canihütütni. Nexuriyacü caniseiriyariemücü. Quepaucua xemi'ieca, 'ipaü xequeteneyurieca xemünesiha'erivanicü. <sup>26</sup> Quepaucua 'icü pa xemuticua'ani, 'icü tecüxi quepaucua

xemanuye'eni, xecatenihecüatacacuni que mütiumü Ti'aitame, mexi canuave.

*Que mütiyüni xüca 'iticuani Ti'aitame 'Icuaiya, 'iyarieya yaca'anecacu*

<sup>27</sup> 'Ayumieme que mü'ane 'icü pa müticuani 'icü tecüxi manu'ieni, hesiena catinaquecacu 'iyarieya que müti'ane, hesiena pürahüiyani miseviximacü Ti'aitame vaiyarieya xuriyaya.

<sup>28</sup> Tevi queyu'inüatani. Müpaü tiyurienetü, 'icü pa quehecuaca, 'icü tecüxitä mieme que'anuye'eni. <sup>29</sup> Mesü, ticua'atü 'ienetü xüca heiseriemecü catimaica tita vaiyarieya mütihüçü, yuhesie rahüpatü catinicuacamüçü cani'iecamüçü. <sup>30</sup> Müpaü xemüteyuriecü, 'ayumieme xeneuveraranini yumüiretü xeme, xetenicucuyeni, yuvaüçavatü meneucusu.

<sup>31</sup> Xüca tacümana teta'inüataque, tatacuri tepücapitüarieniqueyu. <sup>32</sup> Peru Ti'aitame quepaucua mütasita'inüata, teteni'üquitüarieca 'uximatüaricacü, capa te'anutaxüriyanicü cuiepa memütama vahamatü.

<sup>33</sup> 'Ayumieme ne'ivama, quepaucua xemüyuxeürie xetecuanique, xequeneyucuevieca.

<sup>34</sup> Xüca heuhacamüçüni, yuquita quetiucuani, capa xe'u'inüasienicü xeyucuxeürieme. Hipatü müreuyevese 'aixüa netiniyuriemüçü quepaucua nemunuani.

## 12

*'Iyarisie timieme que temüte'umiquiva*

<sup>1</sup> Ne'ivama, neuyeveca 'ipaü xemütemaicacü tita 'Iyarisie mütimieme hepäüsita. <sup>2</sup> Xeme

müpaü xecatenimaica que müti'anecai quepaucua xemünuivaritetücaí xeicüa. Xecanicuhapanietüvecaitüni tetexi memücaniuvave vahesüa, que xemütecühüavarüvacai. <sup>3</sup> 'Ayumieme 'ipaü netinixetahecüatüaniqueyu, tevi xüca müpaü 'utayüni, Quesusi 'axa queticuxaxasivani, 'utaitü, mücü Cacaüyari 'Iyarieyasie tiviyatü püca'utaine. Mücü meta, tevi xüca müpaü 'utayüni, Quesusi catini'aitametüni, 'utaitü, 'Iyari Mütiyupatasie tiviyatü xeicüa caniyüveni müpaü mütayüni.

<sup>4</sup> Yüçü tepüte'umiquiva, 'Iyari yuxevicacu.

<sup>5</sup> Yükü tepüte'uhüritüariva, Ti'aitame yuxevicacu.

<sup>6</sup> Yükü tepütecuyuitüariva, Cacaüyari yuxevicacu. Mücü canihüctüni que mü'ané yunaime müvacuyuitüva naimecü. <sup>7</sup> Taxexuime tahesie, 'Iyari masiüctü canayeitüarivani, 'aixüa temü'itüarienicü tanaitü. <sup>8</sup> Xevitü canipitüarieca mütaniunicü timaivemepaü, 'Iyari yatipitücacu. Xevitüta canipitüarieca mayeniuvenicü vaüca timaitü, mücütüti 'Iyari yuxevitü que mütipitüü.

<sup>9</sup> Xevitüta canipitüarieca yuri müti'eriecacü, mücü 'Iyarisie tiviyatü. Xevitüta canipitüarieca müvaranayexürüvanicü tecuicuicate, mücü 'Iyari müyuxevisie tiviyatü. <sup>10</sup> Xevitüta canipitüarieca türücaüyemecü yamütiyurienenicü, xevitüta müticuxatanicü, xevitüta müva'inüatanicü 'iyarite, xüca 'aixüa me'aneneni me xüca 'axa me'aneneni. Xevitüta 'aiteüya vevietü mütaniunicü canipitüarieca, xevitüta mütihecüatanicü que müticuxaxasiva 'aiteüya veviecacu. <sup>11</sup> Mücü 'Iyari yuxevitü canihüctüni que mü'ané müvacuyuitüva yunaime. Yükü catinivapitüaca yuxexuime, que mütiyuvaüriya.

*Xei vaiyari tecanacüne tanaitü*

<sup>12</sup> Yaxeicüa tavaiyari caniyuxevini, tamamate ta'ücate tatenite naitü timüirecacu. Naitü tavaiyarisie timieme timüirecacu müyuxevipaü vaiyari, müpaüta cani'aneni Cürisitu. <sup>13</sup> 'Iyari müyuxevi que mütatiutaxeviriyaxü, xei vaiyari tecanacüne quepaucua temuca'üyarie, sepa Huriyusixi Cüriyecusixi temühüme, sepa vaüriyarica temüte'uximaya, sepa temütanü'a. Tanaitü tecaniuhatuiyarieni, 'Iyari müyuxevi tahesie mieme mütayeuriyacü.

<sup>14</sup> Mücü meta, ravaiyari xei mamayari xei 'ücyarı pücahücü. Pümüire püta. <sup>15</sup> Ra'üca xüca müpaü hainenique, Ne ramama nemücahücürü, 'ayumieme ravaiyarisie nepücamieme, ravaiyarisie camiemetütü püca'yaniqueyu, müpaü 'utayüca xeicüa. <sup>16</sup> Ranaca xüca müpaü hainenique, Ne rahüxie nemücahücürü, 'ayumieme ravaiyarisie nepücamieme, ravaiyarisie camiemetütü püca'yaniqueyu, müpaü 'utayüca xeicüa. <sup>17</sup> Ravaiyari naitü xüca hüxitünique, queti'enaniqueyu. Naitü xüca nacatünique, queri reu'ücueniqueyu. <sup>18</sup> Peru hicü Cacaüyari ravaiyarisie canicayasa xexuime que mütinäque. <sup>19</sup> Me naitü xüca xei paüriyaritünique, queri tihütütüniqueyu ravaiyari. <sup>20</sup> Masi pümüire, peru ravaiyari caniyuxevini.

<sup>21</sup> Rahüxie püçayüve müpaü mütitahüave ramama, Nepücamasiheuyehüva, 'utaitü. Yaxeicüata ramu'u püçayüve müpaü mütitahüave ra'ücate, Nepücaxeheuyehüva, 'utaitü. <sup>22</sup> Masi titatitürüçavime temüte'erie, mücü yemecü tepeuyehüva. <sup>23</sup> Tavaiyarisie timieme,

tita 'aixüa cati'aneneme temüxata, mücü tecaniquemaritüaca masi. Tavaiyarisie tita visi mücatixeiyarie, visi 'anenetü masi canayeitüarivani,  
<sup>24</sup> tita visi mütixeiyarie müpaü mücareuyevesecü. Masi Cacaüyari nitaxeviriyani tavaiyari, 'aixüa 'iyurienetü masi tita tixaü müreuyehüva,  
<sup>25</sup> tavaiyari capa hixüata saninicü, masi tita tavaiyarisie mütimieme 'axeicüa mütiyü'üviyanicü naitü.  
<sup>26</sup> Xei paüriyari xüca ticuyeni, naitü hamatüana tinicuyecamüçü. Xei paüriyari xüca visi 'u'itüarieni, naitü hamatüana niyutemaviecamüçü.

<sup>27</sup> Xemerı Cürisitu vaiyarieya xecanihümetüni. Yuxexuitü vaiyarieyasie timieme xei paüriyari xecanihümetüni, que xemüte'upitüarie.  
<sup>28</sup> Müme memeyutixexeüriva, hipame canivarucayasa Cacaüyari nü'arisixi meri, 'arique texaxatamete, 'arique te'üquitamete, 'anarique müme türücaüyemecü memüteyurie, 'arique müme memütemiquiva memüvaranayexürüvanicü tecuicuicate, teparevivamete meta, te'aitamete, mümeta 'aiteüya memüvevie.  
<sup>29</sup> Yunaitü nü'arisixi que metehüme. Yunaitü texaxatamete que metehüme. Yunaitü te'üquitamete que metehüme. Yunaitü türücaüyemecü que meteyurie.  
<sup>30</sup> Yunaitü que metemiquiva memüravanayexürüvanicü tecuicuicate. Yunaitü 'aiteüya que metevevie. Yunaitü que mete'ihecüata tita müticuxaxasiva 'aiteüya veviecacu.  
<sup>31</sup> Xequeneyyuvaüriyani 'aixüa 'aneneme masi xemütemiquienicü. 'Acuxi huye yemecü 'aixüa mü'ane necanixetahecüatüamüçü.

*Cuini mieme que müreuyevese  
mütiyucanaqui'eriecacü*

<sup>1</sup> Xüca 'aiteüya nevevienique que memüteniuwave teüteri Cacaüyari tupirisiximama yunaitü, peru xüca necatinecanaqui'eriecaque, tepüa mucuyuanepaü necanayaniqueyu, tirinari mutatiriurücapaü. <sup>2</sup> Xüca netiumiquienique nemüticuxatanicü, xüca netimaicaque naime que müti'avie, naime meta que mütimasiüçü, naimecü yuri neti'erietü xüca neyüvenique yemurite nemüvatayuitüanicü, peru xüca necatinecanaqui'eriecaque, tixaütü nepücatihütüniuey. <sup>3</sup> Xüca nepini naime netivaminique hipame, xüca neneyetuanique nevaiyari mütataiyarienicü, peru xüca necatinecanaqui'eriecaque, tixaütü nepücara'ivaqueyu.

<sup>4</sup> Tiyucanaqui'erietü 'ecatineutevini caha'atü. 'Aixüa catiniuca'iyarini tiyucanaqui'erietü, pücayumexütüa hipame vahepaüsita vara'ivamütü. Tiyucanaqui'erietü pücatiyucatave'erie, püca'utahüsierie.

<sup>5</sup> Yapücatiyuriene que mütiyuteviyasitüa. Pücaticuvaune titä yuhesie mütimieme xeicüa, pücayuhaxüatüa, 'axa müti'anene pücara'eriva.

<sup>6</sup> Pücayutemavie yameteyuriecacu hipatü que mücatiheiserie, masi titä yuri müraine hepaüsita caniyutemavieca. <sup>7</sup> Nai tininevieca, naimecü yuri catini'erieca, naimecü canita'icuevani yuri ti'erietü, naimecü catiniuca'enivani.

<sup>8</sup> Que mütiyucanaqui'erie, hasuacua pücatapare. Que temütecuxata, mücü canitaparimüçü. 'Aiteüya que temütevevie, mücü pücaheuyeveca. Que

temütemaivave, mücüta canitaparimüçü. <sup>9</sup> Xei taparie xeicüa tecanimaica, xei taparie xeicüa tetenicuxatani. <sup>10</sup> Quepaucua munuani que mü'ane tixaütü mücareuyehüva, tita xei tapariesie mütimieme catinitaparimüçü.

<sup>11</sup> Quepaucua nemünunusitüci, nununsipaü netinicuxatacitüni, nununsipaü netininea-maicaitüni, nunusipaü netinicu'erivacaitüni. Quepaucua 'uqui nematüa, netiniuhayeva nunusipaü neyüanetü. <sup>12</sup> Cahecüacamecü tecanineniereni hicü, que mü'ane xicüri mayeyüvisie mücanierepaü. 'Anari tahüxie teniutineniericuni püta. Xei tapariecü netinimaica hicü, 'anari püta netinitimaimüçü, yaxeicüa 'iya münesimatepaü. <sup>13</sup> Mericüsü, yuri que temüte'erie, que temüteta'icueva, que temütetacanaqu'erie, mücü haicatü 'ecatineuterimüçü. Que temütetacanaqu'erie, mücü masi caneuyeveca.

## 14

### *'Aiteüya que memüteveviecai*

<sup>1</sup> Xequeneyumexütüaca xemüteyucanaqui'eriecacü. Mücü meta, xequeneyuvaüriyani 'Iyarisie timieme xemütehexeiyanicü, peru masi yemecü xequeneyuvaüriyani xemütecuxatanicü. <sup>2</sup> Que mü'ane 'aiteüya müvevie, mücü pücavatahüave teüteri. Nitahüave Cacaüyari püta. Tevi püca'i'enie, catinicuxatani tita müti'avie 'Iyari 'icuyuitüvacacu. <sup>3</sup> Que mü'ane mütixaxatame, mücü masi canivarutahüaveni teüteri, vaseiriyatü vatuicatü vanütüatü. <sup>4</sup> Que mü'ane 'aiteüya

müvevie, mücü niyuseiriyani yuxaüta, peru que mü'ané müticuxata, mücü nivaseiriyani müme memüyuyexexeüriva.

<sup>5</sup> Caneninaqueni yunaitü 'aiteüya xemüveviecü, peru pünesinaqueniqueyu masisü xüca xetecuxatanique. Que mü'ané müticuxata 'aixüa caniyüaneni, que mü'ané 'aiteüya müvevie 'aixüa cayüanecacu hepaüna, me xüca xevitü tihecüatani que mutaine xeicüa, 'aixüa caniyüaneni, müme memüyuyexexeüriva memüseiriyarienicü. <sup>6</sup> Hicüri ne'ivama, xüca xehesüa nenuanique 'aiteüya nehevietü, tita netixepitüaniqueyu, me xüca nexetahüavenique netihecüatatu tita müti'aviesiecai, xüca ne'ayeniuvenique, xüca neticuxatanique, xüca neti'üquitanique xeicüa mücücü tixaü nepütixepitüaniqueyu.

<sup>7</sup> Tamüsü, tita mücarayeyuri caniniuveni cürautatütü canaritütü. Xüca 'aixüa catipünarieca, que timasiücüni tita müticürautasieni tita müticanarisieni. <sup>8</sup> Cuxineta xüca hüsierieca cahecüaca, quepai püyucuha'aritüani cuya. <sup>9</sup> Xemerita yaxeicüa, yunenicü xüca niuqui 'aixüa mühecüa xeca'utiniucani, que timasiücüni que xemutiyuane. 'Ecapa xeicüa xeputiniucani. <sup>10</sup> Xüari teüteri vaniuqui canimüireni 'ena cuiepa. Yuxexuitü yuniuquicü me'utiniutü mecani'enierieca. <sup>11</sup> Masi xüca 'asinecatimaica que mutaine niucame, yacü xeicüa tiriurücame necani'eriecamücü niucame, mücüta yaxeicüa canetini'eriecamücü ne. <sup>12</sup> Xemeta xeyuvaüriyatü xemüteheixeiyanicü tita 'Iyarisie mütimieme, xequetenecuvava cuini mieme xemüvaseiriyanicü müme memüyuyexexeüriva.

**13** 'Ayumieme que mü'ane 'aiteüya müvevie, queyutanenevieni müyuhecüatanicü que mutaine. **14** Xüca nenetanenevieni 'aiteüya nehevietü, ne'iyaricü nepünenenevie, peru tixaü pücatiutixuxuavere que nemütinemate.

**15** Quesü yünü. Ne'iyaricü nepünenenevieca, peru yanetinemaitü que nemutaine, müpaüta netinineneviecamüçü. Ne'iyaricü nenitacuicamüçü, peru yanetinemaitü que nemutaine, müpaüta nenitacuicamüçü. **16** Camüsü xüca 'a'iyaricü xeicüa 'aixüa pehaineni Cacaüyari hepaüsita, 'iya vana muca 'enamete memateisie, quepaüricü müpaü paineni, Caniyuritüni niuqui, 'utaitü, quepaucua 'ecü pamüparyusi pemütayüni. 'Asipücatimate que pemutaine.

**17** 'Ecü 'aixüa 'anemecü pamüparyusi pe'ipitüacacu Cacaüyari, 'iya püta pücaseiriyarie mücüçü.

**18** Ne pamüparyusi necanipitüaca Cacaüyari, cuini mieme nemüyüvecü 'aiteüya nemüvevie, nexeha'ivatü xeme yunaime. **19** Peru xeüripa necaninevaüriyani masi 'auxüme niuquiyari nemütaniunicü yanetinemaitü que nemutaine, nemütiva'üquitüanicü hipame, sepa tamamata miriyari niuquiyari nemücataniunicü 'aiteüya nehevietü.

**20** Ne'ivama, türi vahepaü xepücateyumaica. 'Aixüa cani'aneni xüca türi vahepaü 'asixecatemaica tita 'axa müti'ane hepaüsita, peru xequenaye'axüa püta que xemüteyumate.

**21** 'Inüari niuquiyarisie müpaü catine'uca, Nenivatahüavimüçü 'icü teüteri, hipatü yükü memütiniuca yametevacuxaxatüvacacu. Müme vaniuqui yükü mü'anene, vatenicü nenitayümüçü.

Sepa müpaü nemütiyurieni mepücayuvaüriyani memünesi'enienicü, canaineni Ti'aitame. <sup>22</sup> Ayumieme 'aiteüya 'inüari pücahüçü müme yuri memüte'erie vahesie mieme. Müme yuri memücate'erie püta vahesie mieme cani'inüaritüni. Tixaxatame niuquieya 'inüari pücahüçü müme yuri memücate'erie vahesie mieme. Müme yuri memüte'erie püta vahesie mieme cani'ayumiemetüni. <sup>23</sup> Hicü 'axeicüa xüca meyucuxeürioni yunaitü memüyuyexexeüriva, yunaitü 'aiteüya mevevietü, xüca mana meheutahaxüani hipatü 'enamete ya yuri memücate'erie, cari müpaü mecanitiyuacuni, quename xecayumate xeme. <sup>24</sup> Me xüca yunaitü metecuxatani püta, xüca mana heutahani 'enametütü ya yuri cati'erietü, yunaitü menitahecüatacuni que mütiyuri, yunaitü meni'inüatacuni. <sup>25</sup> Tita müti'aviesiecai 'iyarieyasie masiücütü nayeimüçü. Müpaü tiu'ename, 'utihüximaqueme, nenevieri canipitüamüçü Cacaüyari, müpaü 'utaitü, Yuricü Cacaüyari xehesie catiniviyani.

### *Naitü heiseriemecü quetiuyüni*

<sup>26</sup> Queteri 'aneni ne'ivama. Quepaucua xemüyucuxexeüriva, yuxexuitü masi cuicari xecanexeiyani, ya 'üquitüarica, ya xecaniha'arisieca xemütehecüatanicü tita xemüte'uxesisitüarie, ya 'aiteüya xemüvevienicü, ya xemütehecüatanicü tita müticuxaxasiva 'aiteüya veviecacu. <sup>27</sup> Naitü masi quetiuyüni xemüseiriyarienicü. Xüca 'aiteüya vevimüçüni, yuhutatü xeicüa yuhaicatü nusu, xevitü meri, xevitüta 'arique, müpaü

mequeteyurieni. Xevitüta que'ihecüatani vaniuqui. <sup>28</sup> Me xüca 'uca'ayecani que mü'anemütihecüatani 'aiteüya veviecacu, niucamecayuvatü que'umaca xeüripa. Mecuxi queytaxatüani yükümana, quetitaxatüani Cacaüyari. <sup>29</sup> Texaxatamete yuhutatü ya yuhaicatü mequetecuxatani, hipatü meque'i'inüatani titamemüte'utiyua. <sup>30</sup> Xüca xevitü mana 'acaitü tixaütü tiupitüarieni mütihecüatanicü, que mü'anemüticuxata quetiuhayeva. <sup>31</sup> Xecaniyüvavenixemütecuxatanicü yuxexuitü, xevitü meri, xevitüta 'arique, memüteyü'üquitüanicü yunaitü, memütuicarienicü yunaitü. <sup>32</sup> Texaxatamete yu'iyari mecani'aitüaca, <sup>33</sup> Cacaüyari tiyuxamuriecame mücahüccü, cayuvatü tiyupitüvame mühüccü püta.

Que memüteyurie naisarie haque Cacaüyari teüterimama memeyutixexeüriva, <sup>34</sup> cayuvatü meque'umaca 'ucari xeüripa. Mepücapitüariva memütiniunicü. Mequete'aitüarieca masi, yaxeicüa 'inüari niuquiyarita mainepaü. <sup>35</sup> Xüca tixaütü meteyü'üquitüacuni, yükünama mequevacu'ivavyiani yuquita. 'Aixüa püca'ane xüca 'uca 'utaniuni xeüripa.

<sup>36</sup> Mesü, xehesüa xeicüa que rayene Cacaüyari niuquieya. Xehesüa xeicüa quentinua. <sup>37</sup> Xüca tixaxatame yu'erieca, 'Iyari hexeiyame xüca yu'erieca, müpaü quetimaica, titanemütxe'utüirie, mücü Ti'aitame 'aitüaricaya canihüctüni. <sup>38</sup> Me tevi xüca müpaü catimaica, mücüta pücamarivani.

<sup>39</sup> 'Ayumieme ne'ivama, xequeneyumexütüaca

xemütecuxatanicü, peru xecavanenatü 'aiteüya memüvevienicü. <sup>40</sup> Naitü heiseriemecü quetiyüni, xevitü meri, xevitüta 'arique.

## 15

### *Cürisitu que müranucuquetüarie 'umierieca*

<sup>1</sup> Ne'ivama, necanixetahecüasitüiyamüçü niuqui 'aixüa manuyüne, que nemütixecuxaxatüvacai. Xecanitanaqu'erieni müçü niuqui, hesiena xeteviyatü xecaniuti'uni. <sup>2</sup> Xüca cui xe'eyexeiyani tita nemütixecuxaxatüvacai, müçü niuquicü xecanitaviceisitüarieximeni, me yacü xeicüa xüca yuri xete'uta'erieni.

<sup>3</sup> Ne necanixeyetuirieni tita masi müreuyevese, que nemütiyetuiriyarie neta, quename Cürisitu 'ümü tame 'axa temüte'uyuricü, 'utüaricate mainepaü, <sup>4</sup> quename 'ucateuque, quename 'anucuquetüarie hairieca tucari 'aye'acu, 'utüaricate mainepaü, <sup>5</sup> quename Sepaxi 'ixe, 'arique Tamamata Heimana Yuhutatü me'ixe. <sup>6</sup> 'Arique 'auxüme sientuyari heimana yameyupaümetü mechanixeiya 'axeicüa 'ivamarixi. Yumüiretü müme 'ameniu'uvani hicüque, hipatüri meneucusuri. <sup>7</sup> 'Arique Cacuvu nixeiya, 'ariqueta nü'arisixi yunaitü menixeiya.

<sup>8</sup> 'Imatüriecea neta necanixeiya, que mü'ané 'axa 'anetü mutinuivaxüpaü ne'anetü.

<sup>9</sup> Nü'arisixi vasata necani'imatüremetüni ne, 'aixüa nepücatiuca'iyari nehesie mütinaquenicü nü'ariecame nemütaterüvarienicü, nemüvareutaveiyaxüacaicü müme memeyutixexeüriva Cacaüyarisüa miemete. <sup>10</sup> Peru Cacaüyari 'aixüa mütiuca'iyaricü, 'ayumieme

müpaü necani'aneni que nemü'ane. Yacü xeicüa püca'uyü, 'aixüa que mütiuca'iyaricai nehesie mieme. Ne masi cuini mieme necatini'uximayaca, müme yunaitü que memücate'uximayatavave. Peru ne nepücahüçü que mü'ane müpaü mütiyuriene. Cacaüyari püta 'aixüa tiuca'iyaritü nehamatü yacatini'uximayaca. <sup>11</sup> Mericüte, sepa ne, sepa müme, müpaü tetenihecüatani, xemeta müpaü yuri xeteniuta'erieni.

### *Müquite que memüte'anucu'uni*

<sup>12</sup> Cürisitu xüca cuxaxasivani müquite vasata manucuquetüarie, que me'utiyuane xeme hipatü, quename vaniu, müquite meca'anucu'uni. <sup>13</sup> Müquite xüca meca'anucu'uni, Cürisitu püca'anucuquetüarie. <sup>14</sup> Mericüte, xüca Cürisitu ca'anucuquetüarieni, xüanacüa canayani tita temütehecüata, xüanacüa yuri xecateniuta'erieni. <sup>15</sup> Xüca müquite meca'anucu'uni, canimasiücüni que temüte'itava tameta, 'axa temütehecüatacü Cacaüyari hepaüsita, quename henucuquetüa Cürisitu te'utiyuatü, 'iya cahenucuquetüacu, xüca müpaü 'aneni. <sup>16</sup> Mericüsü, müquite xüca meca'anucu'uni, Cürisitu püca'anucuquetüarievetä. <sup>17</sup> Xüca Cürisitu ca'anucuquetüarieni, xüanacüa yuri xeteniuta'erieni, tita 'axa xemüteyuriecaisie xeteniviyani cuxi. <sup>18</sup> Mücü meta, müme memeucusixüa Cürisitusie meteviyatü, müme meniutatümaiyanrieniri. <sup>19</sup> 'Uva mexi te'ayeyuyuri, xüca yuri tete'eriecaqueyu Cürisitusie teta'icuevatü xeicüa, yunaime teüteri vasata tame masi neuyevecaqueyu temünenimayasienicü.

**20** Peru müpaü püca'ane. Cürisitu cananucuquetüarieniri müquite vasata, müme memeucusixüä vamatüari hücütütü. **21** Tevi que mütiuyuri, tame tenitacucuveni. Yaxeicüata xevitü tevi que mütiuyuri, mecananucu'uicuni müquite. **22** 'Aranisie meteviyatü yunaitü que memütetacucuve, müpaürita Cürisitusie meteviyatü yunaitü mecananutanieritüariecuni, **23** yuxexuitü que mütivarunaquixü. Cürisitu vamatüaritütü cananucuqueniri. 'Ariqueta müme Cürisitusüä memümiemete mecananucu'uicuni quepaucua munuani. **24** 'Arique naitü catinitaparimüçü, quepaucua Cürisitu müyuyetuani que müti'aita, 'uquiyarieya müti'aitanicü Cacaüyaritütü. Yacatiniyetuiriemüçü vaca'uname yunaitü memüte'aita, yunaitü heiserie memexeiya türücüariya memexeiya. **25** Caneuyeveca mücü müti'aitanicü mexi vara'iva yunaime memi'uxie. **26** 'Imatürie ca que mürayu'ivani, catanitaxünämüçü temücatacucuvenicüri. **27** Naime caniuçayasa 'iya mi'aitüacacü, que maine 'utuarica. Quepaucua müpaü maine, naitü caniuçayasarieni 'utaitü, canahecüaca müca'ixatacü que mü'ané micayasaxü naime, Cürisitu mi'aitüacacü. **28** Quepaucua mücü mi'aitüaca naime, 'anari mücüta yükümana niyuyetuamüçü, 'uquiyarieya püta mi'aitüacacü, 'uquiyarieya naime mucayasaxüçü nu'aya mi'aitüacacü. 'Ana Cacaüyari naitü catinayeimüçü yunaime vahesie mieme.

**29** Mesü xüca müpaü ca'aneni, que meteyurieni müme memuca'üyarie müquite vahesie mieme. Xüca yemecü müquite meca'anucu'uitüarien, titayari vahesie mieme mete'uca'üyarie.

30 Tameta titayari teteuceriva'a tucaricü.  
 31 Tucaricü 'esivatücacu necanicumemierivani  
 tüma. Ipaü nepaine 'aixüa nemutainecü  
 xehepaüsita ne'ivama, que nemütinetemavie  
 nexeha'erivatü Cürisitu Quesusi mütati'aitüvamesie  
 nemütiviyacü. 32 Teüteri que memüteniniuqui,  
 'Epesusie xüca ne yeutari vahamatü  
 tetacuitüvecaitüni, titasü nera'iva. Müquite xüca  
 meca'anucu'uitüarieni, cümu mecuxi temütecuanı  
 temüte'ieni, 'uxa'a temücuini.

33 Xepücate'irüviiyarieni. Vanütü 'axa 'anenemete,  
 caniseviximamüçü yeiya 'aixüa mü'anı.  
 34 Xequenanutahütüvani heiseriemecü que  
 müreuyevese. 'Axa xepücateyurieca. Hipatü  
 'asimepücatemate Cacaüyari hepäüsita. Ipaü  
 nepaine nexeteviyasitüanique.

### *Quepaü me'anenetü mepanucu'uni*

35 Perusü xüari müpaü paineni xevitü, Quepaü  
 mete'anucu'uitüarieni müquite. Que 'anecacu  
 vavaiyari mepaye'axüani. 36 Cari 'asipepücatimate  
 müpaü pehaitü. Tita pemütiuca'e, mücü xüca  
 ca'umüni, püca'anutanieritüarieni. 37 Mücü  
 meta, tita pemütiuca'e, tita mütitineicapaü  
 'aneme pepüca'uca'e. 'Imüari mümave xeicüa  
 peniuca'eni, türigu 'imüariyari ya xeime 'imüariyari.  
 38 Cacaüyari caniquemaritüaca que mütinaque,  
 yükü tiquemaritüatü xexuime 'imüari que  
 mü'anene. 39 Naitü vai yaxeicüa püca'anene.  
 Teüteri vavaiyari püxevitü, vatevama vavaiyari  
 yükü pü'anene, quesüte vavaiyari yükü pü'anene,  
 viquixi vavaiyari yükü pü'anene. 40 Taheima  
 miemete, cuiepa miemete, yunaitü yükü

mecani'aneneni. Taheima mieme visi pü'anene, cuiepa mieme visi 'anenetü yükü pü'anene. <sup>41</sup> Tau visi cani'aneni, mesata visi pü'ane yükü 'anetü, xuravesixita visi mepü'anene yükü me'anenetü. Xuravesixi yuxexuitü visi me'anenetü yükü mecani'aneneni. <sup>42</sup> Müpaürita catiniyümüçü quepaucua müquite memanucu'uitüarieni. Tita tipünirümetü mütiuca'esi, mücü catipünivetü catinanucuquetüariemüçü. <sup>43</sup> Tita 'axa ticühüavarüvatü mütiuca'esi, mücü visi 'anetü cananucuquetüariemüçü. Tita catürüçaüyetü mütiuca'esi, mücü türüçaüyetü cananucuquetüariemüçü. <sup>44</sup> Vaitütü tita mütiuca'esi, mücü 'iyarisie miemetütü cananucuquetüariemüçü. Xüca ravaiyari xuaveni vai xeicüa hütütü, ravaiyari canixuavenita 'iyarisie miemetütü.

<sup>45</sup> Müpaü catine'uga, Mexüacame tevi, 'Arani mütitevacai, tiyumaitü 'ayeyuritü canayani. Mücü 'imatüreme 'Arani püta, 'iyari tucari tiyupitüvame canayani. <sup>46</sup> Peru tevi 'iyarisie mieme pücahexeiya meri. Vai xeicüa canexeiyani meri, 'arique 'iyarisie mieme canexeiyacamüçü. <sup>47</sup> Mexüacame tevi cuiepa canimiemetücaitüni, cuiecü mutaveviya. 'Imatüreme tevi taheima püta canimiemetüni. <sup>48</sup> Que mü'ane mücü cuiecü mutaveviya, müpaüta mecani'aneneni cuiepa miemete. Que mü'ane mücü taheima mümieme, müpaüta mecani'aneneni taheima miemete. <sup>49</sup> Que temüte'u'uvacai mücü cuiecü mutaveviyapaü tequemaritüarietü, yaxeicüa 'atecaniu'uvacuni 'iya taheima mümiempaü tequemaritüarietü.

<sup>50</sup> 'Ipaü nepaine ne'ivama, tita mütivai

mütixuriya, mücü püçayüveni heixeiyatü mayanicü tita Cacaüyari müra'aita. Tita mütipünive püçayüveni heixeiyatü mayanicü tita mücatipünive.

<sup>51</sup> Camü netinixetahecüasitüiyamüçü tita müti'aviesiecai. Tanaitü tepücaheucusu, peru tanaitü tecanipasiecuni <sup>52</sup> yapaucua, xei cüpiyaricü, 'imatürieца cuxineta tahüsierieyu. Cani-tahüsieriemüçü, müquite mecananucu'uitüariecuni mecatipünivavetü, tameta tecanipasiecuni.

<sup>53</sup> Caneuyeveca 'icü mütipünive menacatüni tita mücatipünive, 'icü mumüxime menacatüni tita mücatimüve peuyevese. <sup>54</sup> 'Anari, quepaucua 'icü mütipünive menacatüni tita mücatipünive, quepaucua 'icü mumüxime menacatüni tita mücatimüve, 'ana canaye'amüçü mücü niuqui müpaü müre'uxa,

Tacucuyame caniutaxütüarieni 'a'ivarieca.

<sup>55</sup> Haqueva pepüra'iva, 'ecü pemütasicuicai 'acu.

Haqueva pepütasiheseni, 'ecü pemütasicuicai 'acu.

<sup>56</sup> 'Axa temüteyuriecü tenicuseivani tecuitü. 'Inüari niuquiyari canitürüçariyani tita 'axa temüteyurie.

<sup>57</sup> Pamüparyusi tecanipitüaca Cacaüyari, mücü mütasipitüacü temüte'ata'ivanicü, Tati'aitüvame Quesusi Cürisitu tasipareviecacu.

<sup>58</sup> 'Ayumieme ne'ivama nemüxenaqui'erie, xesi riyarietü xequenacüne, xepüçayuyuitüarinüaca. Cuini mieme xequetene'uximayaca Ti'aitamesie mieme yuheyemecü, müpaü xetemaitü, Ti'aitamesie xeteviyatü sepa xemüteyu'uxitüa, xüanacüa püca'ayani.

*Tumini que memüte'ucuxëürie Cacaüyari teüterimama vahesie mieme*

- 1 Tumini hepaüsita netinixetaxatüaniqueyu, que xemüte'icuxëüriexime Cacaüyari teüterimama vahesie mieme. Que nemütivaruta'aitüa Carasiya cuileyarisie memeyutixexeüriva, xemeta yaxeicüa xequeteneyurieca.
- 2 Mexüacame tucarisie xexuime semanasie, yuxexuitü xeme xequet'iti'uta yuhesüa, xe'ixeürrietü 'aixüa que xemu'itüarie, 'ana xemüca'icuxexeürivanicü quepaucua nemünuani.
- 3 Mana quepaucua nemeta'ani, müme memü'inüasie xemüvaranuyexeiyacü, müme xapa nevahuritüame nenivararanunü'amüçü, xe'imiquieri memanu'ünicü Querusaremepai.
- 4 Xüca 'aixüa 'aneni nemüyemicü neta, müme mepünesiteütani.

*Papuru que mütiuyeicaniquecai*

- 5 Xehesüa necaneta'amüçü Maseruniyasie neheyeyame. Maseruniyasie nepeuyeyanisü.
- 6 Xehesüa capüca nenehayeva yapaümexa, ya macuhaütüsie naime. 'Arique xeme xecanenanunü'acuni que nemüreuyune.
- 7 Ne'ivatanetü xeicüa nepücaheuyeimüçü xehesüa. 'Enepüreuteviniqueyu masi xehesüa, xüca Ti'aitame müpaü netipitüaca.
- 8 'Epesusie nepünehayeva 'auracacuque 'ixuarari 'atahutarieca semanasie mieme 'aye'ayuque.
- 9 Quitevie catiniuyeipiyanı 'amuyeyevasie nemüti'uximayacakü, yumüretü me'uxiva'acacu.
- 10 Timuteu xüca henuani, xequeneyumexütüaca müçü 'aixüa 'iyaricü xehesüa muyeicanicü. Cacaüyarisie mieme

catini'uximayaca nehepaü. **11** 'Ayumieme xevitü püca'itave'erieca. 'Aixüa xeteyuxexeiyatü xequenanunü'a nehesüa müyemicü. Ne necanicuevieca 'ivamarixi vahamatü.

**12** Ta'iva 'Apuruxi hepaüsita nepütixetaxatüani queyu. Vaüriyarica necanip-itüacaitüni xehesüa müyemicü 'ivamarixi vahamatü. Hicü pücayuvaüriyacai yemecü, peru quepaucua tucari mühüca püyemie niu.

### *Vaürisica que mütivarunü'airiexüa*

**13** Xequenayeneniereni. 'Aixüa xequeneuti'uti yuri xete'erietü. Se'imecü xequeneyüaca. Xequenetürüçavini xetürücariyarietü. **14** Nai que xemüteyurie, xeteyucanaqui'erietü yaxequetenecahuni.

**15** Ne'ivama, 'ipaü netinixevavirieca. Xeme xecanivamaica 'Esítepanaxi quie quiecatari. 'Acaiya cuieyarisie nivesicayari mecanihümümetüni. 'Ayumieme mecanayuyeitüni memüvaparevienicü Cacaüyari teüterimama. **16** Xequeniva'enieca müya memü'anene, yunaime meta müya memüteparevie memüte'uximaya. **17** Necaninetemavieca 'Esítepanaxi Purutunatumatü 'Acahicumatü memü'axüacü yunaitü. Xehesie mieme mepünesitemavieritüa, sepa xemücayüvavecái yunaitü xemahunicü. **18** Mecaneniu'uxipitüni ne'iyarisie, xe'iyarisie mecanixe'u'uxipitüanita. 'Ayumieme xequenivamateni müme müya memü'anene.

**19** 'Asiyatari memeyutixexeüriva mecanixevaüritüaca. 'Aquia Pürisiramatu, müme vaquita memüyuyexexeüriva vahamatü, yunaitü

menixevaüritüaca vaücava, Ti'aitamesie meteviyatü. <sup>20</sup> 'Ivamarixi yunaitü menixevaüritüaca. Xequeneyuvaüritüaca xemeta xeyuviyatü que xemütepasia.

<sup>21</sup> Nemamacü neti'utüatü nenixevaüritüaca ne Papuru.

<sup>22</sup> Xüca xevitü ca'inaqui'erieca Ti'aitame, 'axa que'u'itüarieni. Hepürayusixi que memüteniniuqui, Marana Ta, me'utiyuatü, taniuquicü nepaine, Quenaye'a Ti'aitame.

<sup>23</sup> Ti'aitame Quesusi xüca 'aixüa tiuca'iyanini xehesie mieme. <sup>24</sup> Yunaime necanixenaqui'erieca, Cürisitu Quesusisie netiviyatü.

**Cacaüyari niuquieya xapayari türatu hecuame  
hepaüsita tati'aitüvame tasivicueisitüvame  
Quesusi Cürisitu mi'atüa  
New Testament in Huichol (MX:hch:Huichol)  
El Nuevo Testamento de nuestro señor y salvador  
Jesucristo**

copyright © 1988 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

**Copyright Information**

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Huichol

**© 1988, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 11 Nov 2022 from source files  
dated 29 Jan 2022

79690d81-fd4b-51b4-a3a6-712e0fddaca3